

NIASA LAN TEGES NIASA



TEGES NIASA :

- ha : Warna plung lambang langit (akasa).
- na : Warna putih jroning windu (lingkaran) pinaka lambang bumi (pertiwi).
- ca : Warna plung wayah miwah Gunung pinaka lambang ring Desa Adat Munduk banget nyuciang Gunung, inggih punika Gunung sane dados linggih Ida Bhatara Putra Jaya.
- ra : Warna plung muda mesawang gadang ring ungkur Candi Bentar, pinaka lambang Danu pinaka niasa pragayan predana.
- ka : Candi Bentar pinaka lambang pemiak pantaraning pikayun krama sane becik lan sane kaon.
- da : Cakup tangan pinaka krama Desa Adat Munduk sampun presida tunggil sajeroning ngerestiti Ida Sang Hyang Widhi Wasa.
- ta : Undag tatelu (3), pinaka lambang krama Desa Adat Munduk setate mikukuhang Tri Hita Karana.
- sa : Padi miwah Kapas pinaka cihna murah sandang, pangan miwah kasukertan sane kapuponin olih krama Desa Adat Munduk.
- wa : Asta Dala mewarna coklat, pinaka lambang krama Desa Adat Munduk mangda setate masikian, paras – paro sarpanaya salulung subayantaka.

BANTANG AWIG-AWIG DESA ADAT MUNDUK

NIASA LAN TEGES NIASA	i
BANTANG AWIG-AWIG	ii
MURDHA CITTA	iii
 SARGAH I	 : ARAN LAN WEWIDANGAN, TIPE, MIWAH STATUS DESA ADAT 1
 SARGAH II	 : PAMIKUKUH MIWAH PATITIS DESA ADAT 3
 SARGAH III	 : AWIG-AWIG, PARAREM, MIWAH PASUARAN DESA ADAT 4 Palet 1. Indik Awig-awig Desa Adat 4 Palet 2. Indik Pararem Desa Adat 4 Palet 3. Indik Pasuaran Tiyosan Ring Desa Adat 5
 SARGAH IV	 : SUKRETA TATA PARAHYANGAN DESA ADAT .5 Palet 1. Indik Parahyangan Desa Adat Kahyangan Desa 5 Palet 2. Indik Kasukertan Kahyangan 6 Palet 3. Indik Ngewangun Kahyangan 7 Palet 4. Indik Wewidangan/ Kawasan Suci kahyangan Tiga 8 Palet 5. Indik Yadnya 8
 SARGAH V	 : SUKRETA TATA PAWONGAN DESA ADAT 14 Palet 1. Indik Pawongan Desa Adat 14 Palet 2. Indik Tata Pemerintahan Desa Adat 17 Palet 3. Indik Lembaga Pengambil Keputusan 24 Palet 4. Indik Lembaga Adat 26 Palet 5. Indik Kulawarga 33
 SARGAH VI	 : SUKRETA TATA PALEMAHAN DESA ADAT ... 41 Palet 1. Indik Tanah Desa Adat 41 Palet 2. Indik Karang Miwah Tegal..... 42 Palet 3. Indik Wewangunan, Wewalungan, Miwah Pepayonan 43 Palet 4. Indik Kawasan Perdesaan Desa Adat 46

SARGAH VII	: PADRUWEN, UTSAHA, MIWAH PANGRENCANA DESA ADAT 46 Palet 1. Indik Padruwen Desa Adat 46 Palet 2. Indik Utsaha Desa Adat 47 Palet 3. Indik Penganggaran Desa Adat 47
SARGAH VIII	: TATA PAKILITAN PRAKANTI MIWAH MAJELIS DESA ADAT 48 Palet 1. Tata Hubungan Kerjasama Desa Adat 48 Palet 2. Majelis Desa Adat 48
SARGAH IX	: BHAYA, KULKUL, WICARA MIWAH DANDA 49 Palet 1. Indik Bhaya 49 Palet 2. Indik Kulkul 50 Palet 3. Indik Wicara 50 Palet 4. Indik Danda 51
SARGAH X	: PEWANGUNAN DESA ADAT MIWAH PEWANGUNAN WEWIDANGAN DESA ADAT 53
SARGAH XI	: PENUNTUNAN LAN PANUREKSAN, NGUTSAHAYANGLAN NGERAJEGANG DESA ADAT 54 Palet 1. Indik Penuntunan Desa Adat 54 Palet 2. Indik Ngutsahayang lan Ngerajegang Desa Adat 54
SARGAH XII	: NGUWAH-NGUWIHIN AWIG-AWIG LAN PARAREM 55
SARGAH XIII	: PAMUPUT 55

MURDHA CITA

Om Swastyastu

Om Awighnamastu Nama Siddham

Malarapan saking panghyaning Ida Sang Hyang Widhi Wasa asung kerta wara nugraha ngawentenang kehuripan sekala niskala, ring Bhuana Agung lan Bhuana Alit. Manut dresta desane wantah pawakan pesayuban Krama Desa rawuhing kula warga pawongannya. Desane kaanggehang Bhuana Agung, pawongannya soang-soang pinaka Bhuana Alit.

Sotaning Bhuana Agung, Desane wantah pawakan Bhuana mahurip jangkep saha Tri Hita Karanannyane luwire :

ha. Prahyangan, sahaning kahyangan, penyiwan desa genah ngarcana Ida Sang Hyang Parama Wisesa maka jiwane desane.

na. Pawongan, krama saha warga desa makasami mapawakan bayu pramana mawinan desane sida molih maprawerti.

ca. Palemahan, tanah kakuwuban desa sinanggeh stulaning desane.

Adung patemon bhuana kalih, larapan santi-jagadhita, sinanggeh murdaning prayojana pangeriptaning awig-awig Desa Adat ring paseban sami Krama Desa Adat.

Pinaka sepat siku-siku pamanut : wastu prasida, prayojanan sami kabeh prasama angidep muwah amagehaken kali linggih awig-awig iki.

Om Shanti Shanti Shanti Om

SARGAH I

ARAN LAN WEWIDANGAN, TIPE, MIWAH STATUS DESA ADAT

Pawos 1

- (1). Desa Adat puniki mawasta Desa Adat Munduk
- (2). Jebag kekuwub wewidangannya mawates nyatur :
 - ha. Sisi Wetan : Sisi Kulon Hutan Lindung/ Pemerintah
 - na. Sisi Kulon : Sisi Wetan Desa Adat Gesing : Tukad Cangkup
 - ca. Sisi Kidul : Sisi Lor Desa Adat Kayuputih : Kiduling Pura Prajapati
 - ra. Sisi Lor : Sisi Kidul Desa Adat Gobleg : Tukad Mendaum
- (3). Wates wewidangan inucap manut ring Peta Geosepasial sane kadruwenang Desa Dinas Munduk, Eka Likita Desa Adat Munduk tur mecihna pal wates.
- (4). Wates palemahan wewidangan Desa Adat inucap kapikukuh antuk pamutus paruman Desa.

Pawos 2

- (1). Sane kamanggehang ngeranjing dados kekuwub wewidangan Desa Adat Munduk, manut dresta luwire :
 - ha. Pupulan karang paumahan sane sinanggeh palemahan Desa Adat.
 - na. Setra, carik, tegal miwah danu sane wenten ring kakuwub wewidangan Desa Adat puniki sajawaning palemahan Desa Adat manggeh ngranjing dados talajakan Desa.
- (2). Wewidangan Desa Adat Munduk kakepah antuk pat (4) Banjar Adat luwire :
 - ha. Banjar Adat Tamblingan megenah ring Ersania
 - na. Banjar Adat Bulakan megenah ring Nariti
 - ca. Banjar Adat Taman megenah ring Purwa
 - ra. Banjar Adat Beji megenah ring Madya
- (3). Wewidangan Banjar Adat Tamblingan kakepah antuk telu (3) luwire :

- ha. Tempekan Kangin
- na. Tempekan Tengah
- ca. Tempekan Kauh

(4). Wewidangan Banjar Adat Bulakan kakepah antuk lima (5) luwire :

- ha. Tempekan Bulakan I
- na. Tempekan Bulakan II
- ca. Tempekan Bulakan III
- ra. Tempekan Bulakan IV
- ka. Tempekan Bulakan V

(5). Wewidangan Banjar Adat Taman kakepah antuk pat (4) luire :

- ha. Tempekan Taman I
- na. Tempekan Taman II
- ca. Tempekan Taman III
- ra. Tempekan Taman IV

(6). Wewidangan Banjar Adat Beji kakepah antuk lima (5) luire :

- ha. Tempekan Beji I
- na. Tempekan Beji II
- ca. Tempekan Beji III
- ra. Tempekan Beji IV
- ka. Tempekan Beji V

Pawos 3

Desa Adat Munduk sinanggeh Desa Adat Apanaga

Pawos 4

Desa Adat Munduk pinaka Subyek Hukum manut sekadi Peraturan Daerah Provinsi Bali Nomor 4 Tahun 2019 ngeninin indik Desa Adat di Bali.

SARGAH II
PEMIKUKUH LAN PETITIS DESA ADAT

Pawos 5

Pamikukuh Desa Adat Munduk inggih punika :

ha. Pancasila

na. Undang-undang Dasar Negara Republik Indonesisa Tahun 1945, lan Peraturan tiyosan sane memargi ring NKRI utamanya sane mapaiketan ring kewentenan Kesatuan Masyarakat Hukum Adat utawi Desa Adat ring Bali.

ca. Panagara Mawatata :

- 1). Peraturan Daerah Provinsi Bali Nomor 4 Tahun 2019 Tentang Desa Adat di Bali.
- 2). Peraturan Gubernur Provinsi Bali Nomor 4 Tahun 2020 tentang Peraturan Pelaksanaan Perda Nomor 4 tahun 2019 Tentang Desa Adat di Bali.

ra. Tri Hita Karana manut Agama Hindu

ka. Kaiguman Paruman Desa Adat Munduk sane kelaksanayang ring rahina Wraspati Paing Wuku Medangsia, pinanggal Pitulas (17) Warsa Kalih Tali Empat Likur (2024).

Pawos 6

Patitis Desa Adat Munduk luwire :

ha. Ngukuhin miwah ngerajegang Agama Hindu.

na. Ninggilang tata prawertine megama : lan

ca. Ngerajegang kasukretan Desa saha pawongannyane skala lan niskala.

SARGAH III
AWIG-AWIG, PARAREM, MIWAH PASUARAN DESA ADAT

Palet 1
Indik Awig-awig Desa Adat

Pawos 7

- (1). Awig-awig manggeh kajejerang ring jebag kakuwub wewidangan Desa Adat Munduk.
- (2). Desa Adat wenang ngardi Awig-awig maduluran paruman krama Desa Adat.
- (3). Tata cara ngardi Awig-awig manut pararem.
- (4). Pamargi awig-awig Desa Adat tan wenang lepas ring pamikukuh lan patitis.
- (5). Saluwiring krama patut satinut ring daging Awig-awig Desa Adat.
- (6). Awig-awig patut kailikitayang lan karegistrasi ring Dinas Pemajuan Masyarakat Adat (DPMA) maka pamikukuh kandugi dados kalaksanayang.

Palet 2
Indik Pararem Desa Adat

Pawos 8

- (1). Pararem manggeh kajejerang ring jebag kakuwub wewidangan Desa Adat Munduk.
- (2). Desa Adat wenang ngardi Pararem majalaran paruman krama Desa Adat.
- (3). Pararem Desa Adat luwire :
 - ha. Pararem Penyacah, pararem sane kakardi ngeninin indik ngemargiang daging awig-awig.
 - na. Pararem Pengele, pararem sane kakardi anggen ngemargiang sane durung ngeranjing ring sajeroning awig.
 - ca. Pararem Penepas Wicara, pararem putusing wicara adat.
 - ra. Pararem Sabha Pamutus.
- (4). Tata titi ngardi pararem manut awig.
- (5). Pararem tan wenang lepas ring pamikukuh awig-awig.
- (6). Saluwiring krama patut satinut ring daging pararem.
- (7). Pararem wenang kailikitayang ring Dinas Pemajuan Masyarakat Adat (DPMA) maka pamikukuh kandugi dados kalaksanayang.

Palet 3
Indik Pasuaran Tiyosan Ring Desa Adat

Pawos 9

- (1). Prajuru Desa Adat wenang ngardi pasuaran tiyosan Desa Adat pinaka pemargi awig-awig, pararem manut kabuatannia utawi wit saking pituduh guru wisesa.
- (2). Pasuaran tiyosan Desa Adat kecape ring ajeng patut kesobyahang olih Prajuru Desa Adat ring pesangkepan Desa Adat.
- (3). Pasuaran tan wenang lepas ring awig-awig wiyadin pararem Desa Adat.

SARGAH IV
SUKRETA TATA PARAHYANGAN DESA ADAT

Palet 1
Indik Parahyangan Desa Adat
Kahyangan desa

Pawos 10

- (1). Kahyangan Desa Adat Munduk luwire :
 - ha. Kahyangan Tiga
 - na. Kahyangan Desa
 - ca. Pura Swagina
 - ra. Kahyangan Adat Dalem Tamblingan di Catur Desa (Desa Adat Gobleg, Desa Adat Munduk, Desa Adat Gesing lan Desa Adat Umejero).
- (2). Kahyangan Tiga luwire :
 - ha. Pura Desa Puseh magenah ring Banjar Adat Beji.
 - na. Pura Dalem magenah ring Banjar Adat Bulakan.
- (3). Kahyangan Desa luwire :
 - ha. Pura Prajapati magenah ring Banjar Adat Taman.
 - na. Pura Catus Pata magenah ring Banjar Adat Beji.
- (4). Kahyangan Adat Dalem Tamblingan di Catur Desa luwire :
 - ha. Pura Taman
 - na. Pura Sang Hyang Kauh
 - ca. Pura Gubug
 - ra. Pura Endek
 - ka. Pura Pucak

- (5). Pura Swagina inggih punika Pura sane kaempon antuk krama sane madruwe swagina pateh, minakadi Pura Melanting Tenten, Subak miwah sane tiyosan.
- (6). Rahina piodalan Kahyangan Desa Adat kadi ring sor
 - ha. Pura Desa Puseh, rikala nuju Purnama Sasih Kasa.
 - na. Pura Dalem, rikala nuju Buda Umanis Wuku Julung Wangi.
- (7). Rahina Piodalan ring Kahyangan Desa Adat kadi ring sor :
 - ha. Pura Prajapati, rikala nuju Saniscara Kliwon Wuku Wayang.
 - na. Pura Catus Pata, nike kamargiang napkala Data.
- (8). Pujawali Kahyangan Adat Dalem Tamblingan di Catur Desa kalaksanayang Senangken Kalih Warsa Nemonin Warsa Ganjil.
- (9). Upacara Piodalan ring Kahyangan Desa Adat inucap ring ajeng Alit, Madya, Utama, manut Purana.
- (10). Kahyangan Tiga miwah Kahyangan Desa sami kaempon olih Krama Desa Adat Munduk.
- (11). Kahyangan Adat Dalem Tamblingan di Catur Desa kaempon olih Desa Adat Munduk, lan Desa Adat Gobleg, Desa Adat Gesing, Desa Adat Umejero.

Palet 2 Indik Kasukretan Kahyangan

Pawos 11

- (1). Krama Desa Adat setunggiling ngeranjing ring Kahyangan Desa Adat ngemiletin upacara yadnya patut mabusana jangkep manut dresta.
- (2). Tamiu tan kengin ngeranjing ring Kahyangan Desa Adat sejawaning kengin olih Prajuru Desa tur mabusana manut dresta.
- (3). Pratingkahe tan wenang ring Pura :
 - ha. Masumpah (cor) sejawaning pituduh Prajuru.
 - na. Mamisuh, masesenengan, makolem lanang wadon, mewarih, nyangsang busana.
 - ca. Nyusu anak alit.
 - ra. Munggah tedun palinggih sejawaning pituduh Pemangku utawi Prajuru Desa.
- (4). Perade mamurug kecape ring ajeng wenang kapidanda penyangaskara lan kaaturang ring sane pematut.

Pawos 12

- (1). Sakancan Candala tan dados ngeranjing ring Kahyangan Desa Adat luwire :
 - ha. Catur Cuntaka luwire :
 - 1) Kalayu Sekaran

- 2) Ngeraja Sewala
 - 3) Pawiwahan
 - 4) Kaemabasan Oka.
- na. Sato Agung tur sukupat sejabawaning rikala mapepada.
 ca. Sahanan sane kasinanggeh leteh.
- (2). Sengker utawi wates cuntaka luwire :
- ha. Kelayu Sekaran : Telung tigang (3) Rahina .
 - na. Ngeraja Sewala : Risampun Bersih.
 - ca. Pawiwahan : Risampune Mekala Kalaan.
 - ra. Kaembasan Oka : Tutug Ambuhan (42) Rahina.
- (3). Sengker Kelayu Sekaran luwire :
- ha. Anak alit durung tigang sasih (42) Rahina.
 - na. Mependem 3 Rahina
 - ca. Mekinsan di Geni, usan pecaruan ring pekarangan.
 - ra. Atiwa-tiwa, ngawit ngagem dewasa rauhing pecaruan ring pekarangan.
- (4). Pemangku Kahyangan Tiga lan Kahyangan Desa tan Kacuntakan.

Pawos 13

- (1). Perade wenten jadma ngerusak Parahyangan, bilih-bilih gumanti ngrereh arta brana (mamaling) wenang katiwakin pamidanda manut pararem panyangaskara tur keserahang ring sang wenang.
- (2). Perade Kahyangan Desa kahanan durmenggala minakadi kepancabhaya, pemangku wiyadin sane ngemanggihin patut nyadokang ring Prajuru mangda gelis ketitenin.
- (3). Perade wenten jadma krauhan (tedun) ring pura kengin kepintonin, perade rumasa kesumangsayan, yan tan wiyakti (ngawi-ngawi) patut kasisipang tur kegingsirang saking genah upacara.

Palet 3

Indik Ngewangun Kahyangan

Pawos 14

- (1). Ngewangun Kahyangan Desa Adat patut majalaran antuk Paruman Desa.
- (2). Ngewangun Kahyangan Desa Adat manut gagulak Asta Kosala Kosali.

Palet 4
Indik Wewidangan/ Kawasan Suci Kahyangan Desa

Pawos 15

Gumanti ngulati pelestarian Kawasan suci Kahyangan Desa Adat Munduk luih ipu :

ha. Kahyangan Desa/ Tiga : Tan kengin ngewangun villa, hotel bertingkat miwah sane lianan, yening kirang ring Apanimpug saking Prahyangan inucap (30-50 meter).

Palet 5
Indik Yadnya
Kaping 1
Dewa Yadnya

Pawos 16

- (1). Upacara pujawali ring kahyangan Desa Adat manut kecaping sastra agama kandugi kamargiang nista, madya utama manut kawentenan lan kaiguman.
- (2). Upacara pujawali ring kahyangan Desa Adat kapuput olih Pemangku Desa, Pandita utawi Sulinggih.
- (3). Pemargi piodalan ring kahyangan Desa kaenter antuk Prajuru, Pemangku kahyangan soang-soang, Pemangku lan Serati sejebag Desa Adat, lan kairing Krama Desa.
- (4). Nyabran telung dasa (30) warsa ring Pura Kahyangan patut kemargiang upacara ngenteg linggih mupuk pedagingan miwah mapulang lingga.

Pawos 17

- (1). Pelastian ring Desa Adat Munduk kelaksanayang nyabran warsa ring sasih kesanga (penyepian) nuju pangelong ping telulas (13).
- (2). Pailen upacara pelastian inucap ring ajeng kawengku anut antuk Krama Desa, ngeninin prabea wangi ngangge jinah Desa Adat.
- (3). Indik pamargi pretima lan ampilan rikala pailen upacara pelastian kaenter antuk Prajuru manut dresta tur tan lempas ring sasulur wiyadin sor singgih.
- (4). Prade pengemong penyiwaan durung medruwe Pratima kengin nganggen Daksina Lingga manut dresta.

Kaping 2 Rsi Yadnya

Pawos 18

- (1). Sane pacang Madwijati utawi Madiksa madeg Pandita utawi Sulinggih patut nunas kalugra ring sang rumawos minakadi : Prajuru Desa Adat, PHDI lan Kementerian Agama.
- (2). Prajuru Desa patut sareng nureksa, nitenin mangda sesulur muang pemargine wiyakti manut kecap sastra agama saha tinut nyaksinin upacara padiksan.
- (3). Prajuru Desa patut ngentosin parab sang mediksa manut panugrahan sang Nabe, saha kailikitayang tur kapidartayang ring Paruman Desa.

Pawos 19

- (1). Sane pacang madeg dados Pinandita/ Pemangku patut masadok ring Prajuru miwah PHDI Desa/ Kecamatan/ Kabupaten.
- (2). Prajuru Desa patut/ wenang nitenin, nureksa, tur ngalengin prade cihna sasar ring sesana muang kandala siosan.
- (3). Prajuru patut nyaksinin saupekarania muang midartayang ring Paruman Desa tegep rauhing Prajuru wates kewenangania ngenterang upacara yadnya.
- (4). Perade wenten wiku nilar sesana patut kasadokang ring sang rumawos tur krama di gelis ngewentenang pamutus Pararem.
- (5). Krama Desa katuntun antuk Prajuru Desa sareng ngawas nitenin mangda sahanan upacara yadnya sane kapuput antuk Pandita wiyadin Pinandita (Pemangku, Dalang, Sangging, Balian) manut kewenangannia.

Kaping 3 Pitra Yadnya

Pawos 20

- (1). Pemargi pitra yadnya madudonan pangupakarania mekadi ring sor :
 - ha. Mapendem ;
 - na. Makinsan ring agni.
 - ca. Atiwa-tiwa (Ngaben).
- (2). Ngutang waledan sawe ring genah waledan.
- (3). Krama sane jenek doh ring setra, boye ngelinggihin karang ayahan desa, kengin ngutang banyeh ring pekarangan ngeraga.

- (4). Tan wenang ngutang banyeh ring tukad, telabah, utawi danu.
- (5). Tan wenang mendem wiyadin ngeseng sawe sejawaning ring setra.
- (6). Tan wenang ngeseng sawe dasa wara ngaran Yama lan Guru.
- (7). Tan kengin ngemargiang pitra yadnya ring rahina Purnama, Tilem, Kala Gotongan, Semut Sedulur, Pasah, Tungleh, Paniron, lan rahina suci seosan.
- (8). Tan kengin ngeraksa sawa ritatkala kaberebehan jagat (gerubug).
- (9). Tan kengin mekarya bangbang ring setra sadurung pastika pacang mapendem (nginepang bangbang).
- (10). Yan prade wenten sinalih tunggil krama desa seda ring jaba Desa Adat, sawania dados kabakte mantuk ring Desa Adat sajeroning pacang mutusang bebawos ring keluarganya saha mresteka.
- (11). Sahanan Krama sane ngelaksanayang Pitra Yadnya ring setra Adat patut ngaturang punia keresikan setra manut kaiguman paruman Krama Desa.
- (12). Yan prade Krama ngemargiang upacara kremasi sakewanten nenten wenten dewasa pemargi ring tri desa, ten kengin mapiuning lan ngampigang ring Kahyangan Tiga utawi Pura Dalem.
- (13). Krama Desa sane mamurug kecape ring ajeng wenang kapidanda manut Pararem.

Pawos 21

- (1). Yan prade wenten rare sadurung mayusa tigang (3) sasih, kelayu sekaran patut kapendem nenten ngangge padewasan.
- (2). Yan prade rare punika mayusa langkung ring tigang sasih, tur sampun ketus gigi upacara lan upakarania kemargian sekadi patut.
- (3). Atiwa-tiwa rare sadurung mayusa tigang (3) sasih kasengguh Ngerapuh.
- (4). Atiwa-tiwa rare sane sampun mayusa langkung ring tigang (3) sasih, sadurung ketus gigi kasengguh Ngelungah.

Pawos 22

- (1). Pemargi atiwa-tiwa kaepah kalih luwire ;
 ha. Ngaben dadakan
 na. Ngaben ngemasa (royongan).
- (2). Ngaben dadakan inggih punika atiwa-tiwa sane kemargiang olih soang-soang krama manut kasidania.
- (3). Ngaben ngemasa inggih punika atiwa-tiwa sane kemargiang olih Gerya, Dadya, utawi Desa Adat.
- (4). Desa Adat wenang ngelaksanayang atiwa-tiwa ngemasa nyabran limang warsa manut kawentenan lan kaiguman.
- (5). Pengambilan atiwa-tiwa Desa Adat inggih punika utamaning nista

- (6). Gerya utawi Dadya sane pacang ngelaksanayang atiwa-tiwa ngemasa patut mesadok ring Prajuru Desa Adat indik dudonan acara miwah sane tiyosan.
- (7). Krama dura Tri Desa sane nyarengin atiwa-tiwa ring Gerya utawi Dadya Desa Adat Munduk patut ngaturang punia sahanan sawe seket (50) kg beras, mapiteges nyelang palemahan setra Desa Adat.

Pawos 23

- (1). Indik kapejahan manut luwire ring sor ;
 - ha. Kapejahan Salah Pati.
 - na. Kapejahan Ulah Pati
- (2). Kelayu Sekaran salah pati lan ulah pati dados kapresteka sekadi patut kewanten patut kadulurin antuk upacara penebusan ring genah seda, perempatan agung, lan cangkem setra.
- (3). Kulawarga sane medruwe antake (kepademan) patut ;
 - ha. Mesadok ring Prajuru Desa.
 - na. Nunasang dewasa pemargi ring Bandesa Adat.
- (4). Perade wenten jadma istri seda sakemawon kantun mobot patut kembasang dumun ring rumah sakit wusan punika wenang kapresteka manut pratingkahing pitra yadnya.
- (5). Krama Desa tan kawenangang ngewehin upacara petatahan ring sang sampun antaka (seda).
- (6). Keluarga sane meduwe antaka (kepademan) sakewanten tan mipil ring Desa Adat tan wenang mendem lan ngeseng sawe ring setra Adat Munduk.
- (7). Tan kengin ngumpag-ampig watangan ritatkala ngusung sawa, bilih-bilih ngerusak layon.

Kaping 4 Manusa Yadnya

Pawos 24

- (1). Manusia yadnya inggih punika upacara upakara darmaning manusia ngawit saking patemoning kama petak kelawan kama bang jantos kewekas.
- (2). Upakara inucap ring ajeng madudonan sekadi ring sor ;
 - ha. Magedong-gedongan inggih punika upacara indik ngrempini (garbhadana)
 - na. Sang Kamareka embas (mas rare).
 - ca. Kapus Wed (nelahin)
 - ra. Tutug Kambuhan abulan pitung dina (42 rahina)

- ka. Nigang Sasihin (105 rahina)
 - da. Paweton (6 sasih), mapetik.
 - ta. Mungguh Daha
 - sa. Mepandes (matatah)
 - wa. Pawiwahan
 - la. Mawinten (ekajati muang dwi jati)
- (3). Upacara upakara inucap kamargiang nista, madya utama manut sastra agama lan dresta.
 - (4). Tan wenang mawehakna upacara upakara (manusa yadnya), manut Agama Hindu majeng ring jadma sios agama, sajeroning durung saking sujati ngagem Agama Hindu. Perade mamurug wenang katiwakin pamidanda manut pararem.
 - (5). Krama sane ngelaksanayang upacara pawiwahan patut mesadok lan kesaksi olih Prajuru Desa wiyadin Prajuru Banjar Adat.
 - (6). Krama sane ngemargiang upacara yadnya ring wewidangan Desa adat, patut ngulati keresikan palemahan.

Kaping 5 Bhuta Yadnya

Pawos 25

- (1). Bhuta Yadnya inggih punika upakara upacara muang pecaruan ring pertiwi, kahyangan, manusia, muang bebhutan.
- (2). Upacara pabiakala ring sarwa prani luwire ;
 - ha. Ring sarwaning tumbuhan : Tumpek Pengatag ring Saniscara Kliwon Wariga.
 - na. Ring sarwa ingon-ingon : Tumpek Anandang ring Saniscara Kliwon Uye.
 - ca. Ring gegawan lan sarwa besi : Tumpek Landep, Saniscara Kliwon Landep.
 - ra. Ring unen-unen (wewalian) : Saniscara Kliwon Wayang.
 - ka. Ring manusa : byakala (manut kawigunan).
- (3). Upacara byakala ring pertiwi, kahyangan, lan bebhutan ketah kebawos mecaru.
- (4). Mecaru kamargiang Nista, Madya, Utama sekadi ring sor :
 - ha. Eka Sata
 - na. Panca Sata
 - ca. Panca Sanak
 - ra. Panca Kelud
 - ka. Rsi Ghana
 - da. Tawur Agung (Balik Sumpah, Eka Dasa Rudra, Eka Bhuana, miwah sane tiyosan).

- ta. Sarwa Kadurmanggalan.
- (5). Sejawaning ring ajeng patut kawentenang upacara upakara luwire :
 - ha. Yadnya Sesa (ngejot) nyabran rahina wusan ngerateng.
 - na. Masegeh manut genah muang rerahinan.
 - ca. Macaru Panca Warna nyabran Tilem ring Gerya (jero) nyabran Tilem.
 - ra. Mesesapuh rikala pujawali ring kahyangan utawi genah suci tiyosan.

Pawos 26

- (1). Nyabran awarsa nuju tileming kesanga kawentenang Tawur
Kesanga sane ketah kabawos ngerupuk maka cihna pacang magpag rahina panyepian.
- (2). Upacara Ngerupuk patut kamargiang olih krama desa makacihna sarana nyuciang palemahan saking sarwa bebhutan (kala).
- (3). Ring Rahina Nyepi (Sipeng), krama desa patut manut ring Catur Brata Penyepian inggih punika :
 - ha. Amati Gni : tan kengin meapi-api sekala niskala.
 - na. Amati Karya : tan kengin mekarya.
 - ca. Amati Lelungan : tan kengin medal utawi maleluasan.
 - ra. Amati Lelanguan : tan kengin maseneng-seneng lan masuara geger.
- (4). Krama Desa sami sampun kasinanggeh uning saha nganutin dresta, sima laksana Desa Adat minakadi :
 - ha. Tan medal kemargina
 - na. Tan medamar rikala wengi.
- (5). Catur Brata Penyepian kamargiang wit dauh 00.01 semeng rahina nyepi rauhing dauh 00.01 semeng ngembak geni.
- (6). Ring Rahina Ngembak Geni semeng krama desa patut ngemargiang dresta Nyakan Diwang makacihna putus beberatan.
- (7). Tan kengin ngaryanang paweregan (pawon) rikala rahina penyepian.
- (8). Ring rahina ngembak geni krama desa patut ngelaksanayang dharma santih.
- (9). Krama Desa sane ngemargiang upacara yadnya sane tan dados ketanggehang ritatkala rahina nyepi patut mesadok ring Prajuru.
- (10). Krama sane keni pakeweh nadak utawi sungkan sane patut kabakta ke rumah sakit ritatkala Rahina Nyepi patut mesadok ring Prajuru,
- (11). Krama Desa sane mamurug catur bratha penyepian wenang kapamidanda manut pararem.

SARGAH V
SUKRETA TATA PAWONGAN DESA ADAT

Palet 1
Indik Pawongan Desa Adat
Kaping 1
Krama

Pawos 27

- (1). Sahananing sang jenek utawi mapaumahan ring wewengkon wewidangan Desa Adat puniki sinanggeh krama.
- (2). Krama inucap ring ajeng, linggih nyane wenten tigang (3) soroh :
 - ha. Krama Desa Adat, inggih punika krama bali sane megama hindu, mipil, lan keilikita ring Desa Adat.
 - na. Krama Tamiu, inggih punika krama bali megama hindu, nenten mipil, keilikita ring Desa Adat.
 - ca. Tamiu, inggih punika jadma tiyosan ring krama Desa Adat lan krama tamiu sane wenten ring wewidangan Desa Adat padgatakala utawi jumenek tur keilikita ring Desa Adat.

Pawos 28

- (1). Krama Desa Adat kepah antuk pat (4) soroh luwir ipun :
 - ha. Krama Ngarep ngayah inggih punika krama Desa Adat sane jumenek ring Desa Adat Munduk.
 - na. Krama Penyada inggih punika krama Desa Adat sane sampun lepas ayahan kagentosin antuk sentanan nyane.
 - ca. Krama Balu inggih punika krama sane naanin ngelaksanayang pawiwahan nanging sampun palas.
 - ra. Krama Pengele inggih punika krama sane ten naanin ngelaksanayang pawiwahan kantos mayusa seket warsa (50 tahun).
- (2). Krama Tamiu kepah antuk tigang (3) soroh luwire :
 - ha. Krama Tamiu Jenek utawi Rajeg
 - na. Krama Padunungan
 - ca. Krama Tamiu Padgatakala.
- (3). Tamiu Kepah dados tigang (3) soroh luwire :
 - ha. Tamiu Jenek utawi Rajeg
 - na. Tamiu Padunungan
 - ca. Tamiu Padgatakala

Pawos 29

- (1). Ngawit dados krama Desa Adat sangkaning :
 - ha. Sampun jumenek ring Desa Adat saking dumun.
 - na. Mawiwit saking pawiwahan
 - ca. Matur upeksa utawi mipil ring Prajuru Desa Adat Munduk dados Krama Desa Adat.
- (2). Panemaya tedun mekrama Desa Adat :
 - ha. Mawit saking pawiwahan tigang (3) sasih sesampun upacara widiwidana.
 - na. Ngawit upeksa utawi mipil ring Desa Adat tur sampun nawur penanjung batu ring Banjar Adat utawi Desa Adat manut pararem.

Pawos 30

- (1). Sapasira ugi kengin dados krama Desa Adat Munduk
- (2). Tata cara mipil dados krama Desa Adat Munduk lan ilikita dados krama tamiu wiyadin tamiu keenter manut pararem.

Kaping 2

Swadharma lan Swadikara Krama Desa Adat

Pawos 31

- (1). Saluwiring krama desa adat patut ngulati kesucian, kelestarian, keresikan, lan ketreptian ring desa adat.
- (2). Swadharmaning krama desa adat patut satinut ring daging awig-awig miwah pararem desa adat.
- (3). Sahanan krama desa adat sami kekeninin tetegenan marupa ayah-ayahan, urunan, lan pepeson.
- (4). Krama desa adat sane jumenek ring dura desa kengin nutug sahananing tetegenan krama kagentosin antuk jinah. Krama inucap kasengguh krama ngampel.
- (5). Tetegenan krama desa adat kaenter sekadi luwir ipun :
 - ha. Krama ngarep keni samian tetegenen
 - na. Krama ngampel keni samian tetegenan sakemaon marupa jinah pengampel sane akeh nyane manut pararem.
 - ca. Krama balu tetegenania luwire keni urunan apahro, tetegenan ayahan luput.
 - ra. Krama pengele tetegenania luwire keni urunan apahro, tetegenan ayahan luput.

- (6). Krama desa adat sane ten ngemargiang tetegenan wenang katiwakin pamidanda manut pararem.

Pawos 32

Krama Desa Adat patut nyupeksa ring prajuru desa adat prade :

- ha. Ngewarangang
- na. Kelayu Sekaran (kepademan)
- ca. Kembasan Oka
- ra. Nampi Tamiu jantos makolem sanistanya arahina
- ka. Kapancabhaya
- da. Palas Marabi
- ta. Parindikan lianan sane mepaiketan ring Adat.

Pawos 33

- (1). Krama Desa Adat kadadosang mapewangkid (nyupeksa tan tedun ngayah) prade :

- ha. Newasain utawi ngawitin wewangunan
- na. Mayadnya
- ca. Sungkan
- ra. Matepetin anak sungkan
- ka. Dedauhan saking pemerintah
- da. Sebel utawi cuntaka
- ta. Lunga wantah mewates apisan sejabaning wenten uwakan saking prajuru
- sa. Sampun mayusa pitung dasa (70) tiban.

- (2). Krama sane tan tedun ngayah wenang katiwakin pamidanda manut pararem.

- (3). Krama sane matilar ritatkala ngayah sadurung puput karya tan pasadok wenang katiwakin pamidanda manut pararem.

Pawos 34

- (1). Krama Desa Adat wusan dados krama desa adat sangkaning :

- ha. Seda
- na. Pinunas ngeraga, kesah ke dura Desa.
- ca. Kanorayang (keusanang) mejalaran paruman desa duwaning tan prasida ngesehin solah maprewerti, setata mamurug awig-awig utawi dura cara lianan.

- (2). Krama sane wusan dados krama desa adat patut :

- ha. Tan polih pahpahan saking druwen desa
- na. Muputang hutang ring desa.

Pawos 35

Swadikara krama desa adat luwire :

- ha. Polih pesayuban
- na. Polih pahpahan druwen desa manut awig wiyadin pararem.
- ca. Polih pahan setra desa adat ritatkala wenten upacara pitra yadnya.

Pawos 36

- (1). Krama Tamiu, Tamiu kakepah dados tigang (3) luih ipun :
 - ha. Krama Tamiu Rajeg.
 - na. Krama Tamiu Padunungan.
 - ca. Krama Tamiu Padgatakakal.
- (2). Krama tamiu lan tamiu patut ngardi kasukretan krama ring wewidangan desa adat minakadi : kesucian, kelestarian, keresikan, keamanan, kenyamanan, ketertiban, ketentraman, lan kedamaian sekala lan niskala.
- (3). Kasukretan krama tamiu lan tamiu ring desa adat kaenter manut pararem.

Kaping 3

Indik Penyanggran Karya Suka Dukha

Pawos 37

Krama desa sane pacang nangun karya suka dukha sane mabuwat mangda mesadok ring prajuru desa.

Palet 2

Indik Tata Pemerintahan Desa Adat

Kaping 1

Prajuru Desa Adat

Pawos 38

- (1). Tata Pemerintahan Desa Adat Munduk wenten 2 (duang) soroh inggih punika Kelembagaan Pemerintahan Desa Adat lan Lembaga Pengambilan Keputusan Desa Adat.

- (2). Kelembagaan Pemerintahan Desa Adat Munduk luwire :
 - ha. Prajuru Desa Adat
 - na. Sabha Desa Adat
 - ca. Kertha Desa Adat, lan
 - ra. Banjar Adat.
- (3). Lembaga Pengambilan Keputusan Desa Adat Munduk luwire :
 - ha. Paruman Desa Adat
 - na. Pesangkepan Desa Adat

Pawos 39

Prajuru Desa Adat Munduk luwire :

- ha. Bendesa Adat
- na. Petajuh utawi Pangliman pinaka wakilnia
- ca. Penyarikan utawi juru surat
- ra. Patengen utawi juru raksa, lan
- ka. Baga-baga (Parahyangan, Pawongan, lan Palemahan).

Pawos 40

- (1). Bendesa Adat kacatri olih krama desa adat manut kaiguman parasparo krama desa adat nyabran limang (5) warsa.
- (2). Prajuru Desa Adat kacatri lan kemanggehang olih Bendesa Adat majalaran paruman Sabha Desa Adat.
- (3). Tata cara ngadegang Bendesa Adat lan nyatri Prajuru Desa Adat kaenter manut pararem.
- (4). Warsa ayahan Prajuru Desa Adat inggih punika limang (5) warsa melarapan manut pararem.
- (5). Prajuru Desa Adat ngemargiang amongan lan swadarmanipun sareng-sareng.
- (6). Prajuru Desa Adat kengin ngangkat staf administrasi umum lan keuangan manut kabuatan.

Pawos 41

Amongan lan swadarmaning Prajuru Desa inggih punika :

- ha. Ngardi rencana strategis lan rencana pembangunan Desa Adat.
- na. Ngardi rencana pendapatan lan belanja Desa Adat.
- ca. Ngelaksanayang rencana pewangunan inucap majalaran ring Parahyangan, Pawongan, lan Palemahan.
- ra. Ngelaksanayang awig-awig lan utawi pararem Desa Adat.
- ka. Muputang sahanan wicara sane wenten ring wewidangan Desa Adat.

- da. Ngenter pamargi parikrama social lan keagamaan manut sastra utawi dresta.
- ta. Nyupeksa indik pamargi pewangunan Desa Adat ring paruman krama Desa Adat.

Pawos 42

Prajuru Desa Adat wenang :

- ha. Mutusing rencana strategis sane kakardi olih LPD lan BUPDA.
- na. Ngemanggehang Rencana Anggaran Pendapatan lan Belanja Desa Adat dados Anggaran Pendapatan lan Belanja Desa Adat nyabran warsa.
- ca. Nganggen padruwen Desa Adat rikala ngelaksanayang amongania.
- ra. Nangkat lan ngusanang Panureksa lan Prajuru LPD miwah BUPDA risampun polih kacumpuan antuk Sabha Desa Adat.
- ka. Ngelaksanayang panureksan ring sahanan parikrama krama sane memargi ring wewidangan Desa Adat.
- da. Niwakang pamidanda majeng krama manut pamutus paruman Desa Adat.
- ta. Pinaka utusan desa adat risajeroning parikrama manut paruman Desa Adat.
- sa. Ngelaksanayang kapatutan manut awig-awig wiyadin pararem.

Pawos 43

Prajuru Desa Adat tan patut :

- ha. Mamurug ring awig-awig lan pararem.
- na. Ngardi kaiguman sane ngawi wicara ring krama Desa Adat.
- ca. Lempas ring amongan, swadharma, lan kapatutan.
- ra. Ngardi parisolah sane tan manut ring sajeroning sesana.
- ka. Dados angga utawi prajuru *organisasi terlarang*.

Pawos 44

Prajuru Desa Adat sane mamurug kapatutan inucap ring ajeng kapamidanda manut awig utawi pararem.

Pawos 45

- (1). Ring sajeroning ngelaksanayang amongan ngerencana pewangunan Desa Adat, prajuru Desa Adat kesarengin antuk Sabha Desa Adat.

- (2). Ring sajeroning mutusing sahanan wicara, prajuru desa adat kasarengin Kertha Desa Adat.

Pawos 46

Swadikara petias utawi olih-olihan prajuru Desa Adat :

- ha. Luput ayahan lan pepeson desa wiyadin banjar.
- na. Pahan sesari saking upacara ring kahyangan desa.
- ca. Muwah sane tiyosan manut ring pararem.

Pawos 47

- (1). Prajuru Desa Adat kagentosin utawi kausanang sangkaning :
- ha. Seda
 - na. Pinunas ngeraga sesampun kelokita ring paruman desa
 - ca. Telas warsa ayahan nyane
 - ra. Nilar sesana, swadharma miwah kawenangania.
- (2). Bendesa Adat sane kausanang patut kagentosin antuk patajuh utawi panglimannia.
- (3). Yen perade Bendesa Adat kausanang wit sangkaning pinunas ngeraga patut kagentosin olih petajuh pinaka Bendesa Adat rauhing telas warsa ayahannyane.
- (4). Petajuh utawi prajuru sane ngentosin Bendesa patut kadulurin ke Dewa Saksi ring Pura Desa Puseh tur katunasang pengukuhan ring Provinsi.
- (5). Bendesa Adat sane munggah dados calon Perbekel tur prasida kapilih, patut ngundurang raga (tan kangkat ngerangkep).
- (6). Nungkaliknyane Perbekel sane munggah dados calon Bendesa Adat tur prasida kapilih, patut ngundurang raga (tan kangkat ngerangkep).

Kaping 2 Sabha Desa

Pawos 48

- (1). Sabha Desa, inggih punika sawitran Prajuru pinaka pendamping tur ngicen dharma tetimbang indik dharmaning agama lan dharmaning negara.
- (2). Sabha Desa akweh nyane lima (5) diri.
- (3). Sane kaadegang Sabha Desa luwirnya :

- ha. Mawiwit saking krama ngarep, perwakilan saking soang-soang Banjar Adat, naenin dados Prajuru Desa Adat utawi Prajuru Banjar Adat.
- na. Sang sane sampun sinanggeh wikan ring tata cara, sastra, budaya bali, lan dresta.
- ca. Sang sane sinanggeh uning ring indik awig-awig, pararem, miwah ngerencana pewangunan lan ngerencana Anggaran Pendapatan dan Belanja Desa Adat.
- ra. Mayusa nenten langkungan ring pitung dasa (70) warsa.
- ka. Kakukuhan lan kailikita olih Prajuru/ Bendesa Adat.

Pawos 49

(1). Tata cara ngadegang Sabha Desa Adat inggih punika :

- ha. Mawiwit saking krama ngarep, naenin dados Prajuru Desa utawi Prajuru Banjar.
- na. Mayusa nenten langkung ring pitung dasa (70) warsa.
- ca. Kacatri olih Prajuru Banjar pinaka duta saking Banjar Adat majalaran paruman desa.
- ra. Kadulurin antuk Dewa Saksi ring Pura Desa Puseh lan kailikita olih Prajuru/ Bendesa Adat.

(2). Prajuru Sabha Desa Adat kadi ring sor :

- ha. Adiri Kelian, lan
- na. Papat Angga.

(3). Masa ayahan Prajuru Sabha Desa sinarengan ring Prajuru Desa Adat

Pawos 50

Swadharma Sabha Desa, ngicenin dharma tetimbang majeng ring Prajuru Desa Adat, rikala :

- ha. Ngardi awig-awig lan pararem Desa Adat.
- na. Ngerencana pawangunan Desa Adat.
- ca. Ngerencana olih-olihan lan prabia Desa Adat.
- ra. Ngelaksanayang pangrencana Desa Adat.

Pawos 51

Sabha Desa kausanang prade :

- ha. Seda
- na. Pinunas Ngeraga sesampun kelokita ring paruman Desa.
- ca. Telas warsa ayahan nyane.
- ra. Kanorayang antuka nilar sesana mejalaran paruman desa.

Pawos 52

Swadikara utawi pituas (olih-olihan) Sabha Desa luwire :

- ha. Luput ayahan lan pepeson Desa wiyadin Banjar.
- na. Muwah sane tiyosan manut ring pararem.

Kaping 3 Kertha Desa

Pawos 53

- (1). Kertha Desa kakardi olih Prajuru Desa Adat.
- (2). Kertha Desa Adat kecape ring ajeng inggih punika :
 - ha. Prajuru Desa Adat, lan
 - na. Krama Desa Adat sane medruwe keweruhan lan wikan ring sajeroning wicara, pinaka duta Banjar Adat.
- (3). Bendesa Adat pinaka Kelian wiyadin Angga Kertha Desa Adat.
- (4). Warsa ayahan Kertha Desa Adat sinarengan sareng Prajuru Desa Adat.

Pawos 54

Kertha Desa Adat medruwe amongan lan wenang :

- ha. Nampi, nureksa lan muputang sahanan wicara ring wewidangan Desa Adat manut Hukum Adat Bali.
- na. Ring sajeroning muputang wicara, Kertha Desa Adat patut manut parasparo druwenan sareng-sareng (ngutamayang panyama braya).
- ca. Yan perade tan kacumpuin antuk parasparo, Kertha Desa Adat patut niwakang pamutus manut ring awig-awig lan utawi pararem.
- ra. Yan prade wicara inucap tan prasida kapuputang olih Kertha Desa Adat, patut nunas pamuput majeng ring MDA manut undagania.

Pawos 55

- (1). Kertha Desa Adat akwehnya lima (5) diri.
- (2). Sane dados kaadegang Kertha Desa Adat luwire :
 - ha. Mawiwit saking krama ngarep, naaning dados Prajuru Desa Adat utawi Prajuru Banjar Adat.

- na. Wikan ring daging sastra agama, hukum adat, lan hukum nasional.
 - ca. Mayusa nenten langkungan ring pitung dasa (70) warsa.
 - ra. Kacatri olih Prajuru Desa pinaka duta saking Banjar Adat mejalaran paruman desa.
- (3). Kadulurin antuk Dewa Saksi ring Pura Desa Puseh tur kailikita olih Prajuru/ Bendesa Adat.

Pawos 56

Kertha Desa kausanang perade :

- ha. Seda
- na. Pinunas Ngeraga sesampun kelokita ring paruman desa.
- ca. Telas warsa ayahan nyane.
- ra. Kanorayang antuka nilar sesana mejalaran paruman desa.

Pawos 57

Swadikara utawi pituas (olih-olihan) Kertha Desa luwire :

- ha. Luput ayahan lan pepeson Desa wiyadin Banjar.
- na. Muwah sane tiyosan manut ring pararem.

Kaping 4 Indik Banjar Adat

Pawos 58

- (1). Banjar Adat ngelaksanayang parikrama krama lan agama ring Banjar Adat.
- (2). Banjar Adat kaenter olih Prajuru Adat kapucukin Kelian Banjar Adat.
- (3). Prajuru Banjar Adat kacatri antuk parasparo krama Banjar Adat mejalaran paruman Banjar Adat.
- (4). Banjar Adat kakukuhang lan kailikita olih Prajuru/ Bendesa Adat.

Pawos 59

- (1). Amongan Prajuru Banjar Adat :
 - ha. Ngewangun pasikian majeng ring Desa Adat.
 - na. Ngemargiang awig-awig lan utawi pararem wiyadin awig-awig Banjar Adat.

- ca. Ngenter pemargi parikrama krama lan agama ring Banjar Adat.
 - ra. Muponin padruwen Banjar Adat.
 - ka. Ngenter lan nitenin palemahan Banjar Adat.
- (2). Prajuru Banjar Adat wenang :
- ha. Ngemargiang paruman lan pesangkepan Banjar Adat.
 - na. Ngenter krama ring parikrama krama banjar lan agama miwah palemahan Banjar Adat.
 - ca. Muputang sahanan wicara sane wenten ring wewidangan Banjar Adat manut kawenangania.
 - ra. Nyudi sinoman pinaka juru warah ring soang-soang Tempekan.
 - ka. Masa ayahannia sinarengan ring Prajuru Desa Adat.

Pawos 60

Swadikara utawi pituas (olih-olihan) Prajuru Banjar Adat luwire :

- ha. Luput ayahan lan pepeson Desa wiyadin Banjar.
- na. Muwah sane tiyosan manut ring pararem.

Palet 3

Indik Lembaga Pengambil Keputusan Kaping1 Paruman Desa Adat

Pawos 61

- (1). Paruman Desa Adat Munduk inggih punika *Lembaga Pengambilan Keputusan Tertinggi* ring Desa Adat risajeroning :
 - ha. Ngemanggehang awig-awig
 - na. Ngemanggehang Bendesa Adat lan utawi Prajuru Desa Adat kacatri ; lan
 - ca. Ngemanggehang parindikan sane mabuat tiyosan risajeroning ngenter pemargi Desa Adat.
- (2). Paruman Desa Adat kelaksanayang olih Prajuru Desa Adat kamiletin antuk krama Desa Adat miwah *Duta Kelembagaan* Desa Adat.
- (3). Parindikan mabuat sane kecap ring ajeng luwire ngeninin indik parahyangan, pawongan, lan palemahan pinaka pemargi Tri Hita Karana.
- (4). Paruman Desa Adat kelaksanayang senistania apisan awarsa utawi manut kabuatania (padgatakala).

- (5). Yan parade paruman Desa Adat tan sida kelaksanayang olih Prajuru Desa Adat, Paruman Desa Adat wenang kelaksanayang wit sangkan arsa angga pinih wredha utawi teruna Sabha Desa Adat.
- (6). Paruman Desa Adat manut dudonan ring sor :
 - ha. Prasidha lumaksa risampun kerawuhin sang ngemiletin, mebusana adat manut dresta tan kengin makta gegawan.
 - na. Pengawit kelaksanayang penyahcah sepsepan
 - ca. Tan maren manggala ngarcana ring Ida Bhagawan Penyarikan maka sarana widi widana (manut ring Pura Desa Puseh).
- (7). Pamutus paruman kautsahayang melarapan antuk paswaran gilik seguluk.
- (8). Yan prade paruman tan prasidha kaigumin jantos ping tiga (3), Prajuru wenang niwakang pamutus ring paruman pamuntat.
- (9). Pamutus paruman desa sinanggeh kaiguman.
- (10). Yan parade wenten parindikan tiyos, paruman desa siddha kemargiang wantah kamiletin olih para ulun dadya.

Pawos 62

Risajeroning paruman krama desa tan wenang :

- ha. Ngeraos sane tan patut.
- na. Ninggal paruman tan pasadok.
- ca. Mabusana sane tan manut dresta.
- da. Makta gegawan.

Kaping 2 Pesangkepan Desa Adat

Pawos 63

- (1). Pesangkepan krama Desa Adat sinanggeh *Lembaga Pengambilan Keputusan* dibawah Paruman Desa Adat utamania mepaiketan ring parindikan *teknis* sane mabuat.
- (2). Pesangkepan krama Desa Adat kelaksanayang olih Prajuru Desa Adat kerawuhin olih sami krama Desa Adat.
- (3). Parindikan *teknis* inucap ring ajeng luwire ngeninin indik Pahrayangan, Pawongan, lan Palemahan.
- (4). Pesangkepan Desa Adat kemargiang manut dresta.

Pawos 64

- (1). Pesangkepan Desa Adat patut :
 - ha. Kawentenan tigang (3) sasih apisan, bilih-bilih asasih, manut kawigunannia muah padgatakala.
 - na. Kesarengin antuk Prajuru Desa utawi Banjar saha pamucuk-pamucuk ring Desa perade kapisaratang kerawuhannia.
- (2). Ring sajeroning pesangkepan Desa Adat wenang ngonekang pasuaran saking amangkurat tur ngonekang Paruman Desa Pecak.
- (3). Risajeroning pesangkepan Desa Adat pemilet tan wenang :
 - ha. Ngeraos sane tan patut.
 - na. Ninggal paruman tan pasadok.
 - ca. Mabusana sane tan manut dresta.
 - da. Makta gegawan.

Palet 4
Indik Lembaga Adat
Kaping 1
Paiketan Pemangku

Pawos 65

- (1). Ring soang-soang kahyangan Desa Adat patut wenten pemangku lanang wyadin istri.
- (2). Pemangku luwire :
 - ha. Pemangku Kahyangan Tiga.
 - na. Pemangku Kahyangan Desa Adat.
 - ca. Pemangku Pura Swagina.
 - ra. Pemangku Dadya utawi Merajan.

Pawos 66

- (1). Ngadegang pemangku Kahyangan Tiga lan Kahyangan Desa manut dudonan :
 - ha. Ngewaris ngewilang saking turunan, sane sampun grahasta.
 - na. Kacatri antuk krama desa adat taler sane sampun grahasta utawi mekrama tur sampun polih penyinangaskara saking pawijilannia.
 - ca. Nedunang Ida Batara mejalaran premas :
 - ra. Mejalaran Kwangen.

- (2). Sane tan wenang keadegang Pemangku Kahyangan Tiga lan Kahyangan Desa Adat :
 - ha. Candala luwire : peceng, perot, muang ceda sane tiosan.
 - na. Ulah cacad luwire : angrabi wonga arabi, mitra ngalang, ngemaduang, muang cacad patunggilannia.
 - ca. Kageringan luwire : sakit ila, ayan, buduh, utawi panyungkan ilania.
 - ra. Tan uning ngewacen lan nyurat aksara.
- (3). Prabea ngadegang Pemangku Kahyangan Tiga wiadin Kahyangan Desa Adat patut saking Desa Adat utawi krama.

Pawos 67

- (1). Pemangku Kahyangan patut misinggihang sesana pemangku.
- (2). Yan perade Pemangku Kahyangan inucap mamurug patut keprayascita manut agama tur manut agung alit pamuruge olih ngereraga.
- (3). Perade Pemangku Kahyangan inucap nilar sesana patut kausanang.

Pawos 68

- (1). Swadarmaning Pemangku Kahyangan Tiga wiadin Kahyangan Desa :
 - ha. Nantebang upacara yadnya sekasidania ring Kahyangan Desa Adat muang ring amongannia.
 - na. Nuntun saha nitenin kesucian Kahyangan.
 - ca. Perade wenten krama desa ngaturang uninga ring kahyangan Desa Adat patut kapuputang/ keenter olih pemangku kahyangan inucap.
- (2). Pemangku Kahyangan Tiga wiadin Kahyangan Desa Adat kagentosin utawi kausanang prade :
 - ha. Kepunggelang yusa.
 - na. Sungkan tan prasidha ngemargiang swadarma.
 - ca. Pinunas ngeraga sesampun kelokita ring paruman desa.
 - ra. Nilar sesana pemangku risampun kelokita ring Paruman Desa.
- (3). Yan perade Pemangku Kahyangan kapunggelang yusa, tan wenang kependem, upacaranyane kerombo antuk krama desa sanistannia mekinsan ring geni, yan perade keluarga mangku inucap prasidha ngelaksanayang upacara, krama desa wantah mapitulung.

- (4). Pemangku Kahyangan sane wusan wit sangkaning kapunggelang yusa utawi sungkan tan prasidha ngemargiang swadarma, patut kagentosin antuk pemangku istri nyane manut kasidannia.
- (5). Yan prade pemangku istri inucap ring ajeng mawiwaha patut kausanang.

Pawos 69

Pituas (pikolih) Pemangku Kahyangan inggih punika :

- ha. Pah tiga (3) saking sesari upacara piodalan.
- na. Luput ayahan muang tetegenan desa lan banjar.
- ca. Pituas tiyosan manut tetimbang prajuru lan pararem.

Pawos 70

- (1). Paiketan Pemangku inggih punika paiketan para pemangku sane wenten ring wewidangan Desa Adat Munduk.
- (2). Prajuru paiketan pemangku sekadi ring sor :
 - ha. Adiri Kelian.
 - na. Adiri Petajuh.
 - ca. Adiri Penyarikan.
- (3). Angga paiketan pemangku mawiwit saking Pemangku Kahyangan, Pemangku Pura Swagina, lan Pemangku Dadya utawi Mrajan ring sejabag Desa Adat Munduk.
- (4). Paiketan Pemangku ngelaksanayang parikrama risajeroning adat, agama, seni dan budaya.
- (5). Paiketan pemangku patut ngeremba sahanan yadnya sane memargi ring Desa Adat minakadi piodalan miwah dewa yadnya tiyosan.

Pawos 71

Sesana pemangku luwire :

- ha. Ngelaksanayang Catur Bandana Dharma minakadi Amati Wesa, Amati Aran, Amati Sesana, lan Maguna Susrusa.
- na. Ngelaksanayang Tri Sila Parartha minakadi Asih, Punia, lan Bakti.
- ca. Ngelaksanayang Brata minakadi Panca Yama Brata, Panca Nyama Brata.
- ra. Susila manut lontar Yoga Semadi Utama, Widhi Sastra, Purwa Adhi Guna, Dewa Tatwa, miwah Siwa Tatwa lan Pancamo Limo.
- ka. Nganutin pantangan pariboga.

- da. Nganutin pantangan busana parilaksana minakadi tan kengin meperucut (lingga mudra), lan nganggen Genta Tabuh Telu rikala nganteb.

Kaping 2 Paiketan Serati

Pawos 72

- (1). Paiketan Serati Desa Adat sinanggeh paiketan serati sane wenten ring soang-soang Banjar Adat.
- (2). Paiketan Serati ngelaksanayang parikrama ring sajeroning baga adat, agama, seni, lan budaya.
- (3). Serati mawiwit saking krama istri ring Banjar Adat sane sinanggeh uning ring sajeroning bebantenan miwah caru, manut linging Tatwa Wrespati Kalpa, Widhi Sastra, Mpu Lutuk miwah sapanunggalannia.
- (4). Swadharma Paiketan Serati :
 - ha. Natingin prajuru nyayagayang sahanan upakara banten yadnya Desa Adat perade katunasin manut pegilih.
 - na. Nyoroh lan nyarengin upacara yadnya perade katunasin manut pegilih.

Kaping 3 Paiketan Wredha

Pawos 73

- (1). Paiketan Wredha sinanggeh genah krama wredha sane ngelaksanayang parikrama nincapang kaweruhan wredha ring wewidangan Desa Adat.
- (2). Paiketan Wredha ngelaksanayang parikrama minakadi ring baga :
 - ha. Adat, agama, tradisi, seni dan budaya, serta kearifan lokal.
 - na. Pendidikan dan olahraga.
 - ca. Kesehatan.
 - ra. Ekonomi, lan
 - ka. Sosial.
- (3). Desa Adat patut ngulati indik kawentenan krama wredha sane wenten ring wewidangan Desa Adat.

Kaping 4
Paiketan Pacalang

Pawos 74

- (1). Pecalang ngelaksanayang amongan ring baga keamanan, ketentraman, lan ketertiban krama ring wewidangan Desa Adat.
- (2). Pecalang kangkat lan kausanang olih Desa Adat manut putusing Prajuru Desa Adat.
- (3). Tata titi ngadegang Pecalang keenter manut pararem.
- (4). Amongan Pecalang keenter manut Tuntunan Sasana Pecalang sane kemanggehang antuk MDA Provinsi Bali.
- (5). Prajuru Pecalang sekadi ring sor :
 - ha. Adiri Kelian
 - na. Adiri Petajuh
 - ca. Adiri Penyarikan
 - ra. Adiri Petengen
- (6). Pecalang kausanang utawi kagentosin perade :
 - ha. Seda.
 - na. Sungkan tan sidha ngemargiang swadharma.
 - ca. Nilar sesana Pecalang.
 - ra. Sampun mayusa pitung dasa (70) warsa.
- (7). Swadikara olih-olihan Pecalang luwire :
 - ha. Luput tetegenan, ayahan, lan pepeson.
 - na. Olih-olihan siosan manut pararem.

Kaping 5
Paiketan Yowana Desa Adat

Pawos 75

- (1). Paiketan Yowana Desa Adat inggih punika paiketan teruna teruni sane wenten ring wewidangan Desa Adat.
- (2). Yowana Desa Adat ngemargiang parikrama ring baga teruna teruni minakadi :
 - ha. Adat, agama, tradisi, seni, budaya, lan kearifan lokal.
 - na. *Pendidikan dan olahraga*
 - ca. *Kesehatan*
 - ra. *Ekonomi*
 - ka. Muah sane tiyosan.

Pawos 76

- (1). Prajuru Yowana Desa Adat sekadi ring sor :
 - ha. Adiri Kelian
 - na. Adiri Petajuh
 - ca. Adiri Penyarikan
 - ra. Adiri Petengen
- (2). Tata titi ngadegang Prajuru Yowana inggih punika :
 - ha. Kacatri majalaran Paruman Yowana Desa Adat.
 - na. Kaupasaksi ring Pura Desa Puseh.
- (3). Warsa ayahan Prajuru Yowana Desa Adat inggih punika limang (5) warsa.

Pawos 77

- (1). Swadharma Paiketan Yowana inggih punika :
 - ha. Ngeremba parikrama Desa Adat ring parahyangan, pawongan, lan palemahan.
 - na. Nincapang kaweruhan raga minakadi ring adat, agama, dresta, seni, miwah budaya.
- (2). Swadikara Paiketan Yowana inggih punika :
 - ha. Pesayuban saking Desa Adat.
 - na. Ngangge pradruwen Desa Adat.

Pawos 78

Prajuru Yowana kausanang utawi kagentosin perade :

- ha. Mawiwaha.
- na. Nilar sesana Paiketan Yowana.
- ca. Telas warsa ayahannyane.

Kaping 5

Paiketan Krama Istri Desa Adat

Pawos 79

- (1). Paiketan Krama Istri Desa Adat sinanggeh paiketan istri krama desa ring Desa Adat.
- (2). Paiketan Krama Istri Desa Adat kapucukin olih istri Bendesa Adat.
- (3). Paiketan Krama Istri Desa Adat ngelaksanayang parikrama ngeremba parikrama Desa Adat lan usaha nincapang kasukretan kulawarga majalaran :

- ha. Adat, agama, tradisi, seni, budaya, lan kearifan lokal.
- na. *Pendidikan dan olahraga.*
- ca. *Kesehatan*
- ra. *Ekonomi*
- ka. Muah sane tiyosan.

Pawos 80

- (1). Prajuru Paiketan Istri Desa Adat luwire :
 - ha. Adiri Kelian
 - na. Adiri Petajuh
 - ca. Adiri Penyarikan lan
 - ra. Adiri Petengen
- (2). Tata titi ngadegang Prajuru Paiketan Istri Desa Adat inggih punika :
 - ha. Prajuru sejabaning Kelian Paiketan, kacatri majalaran paruman.
 - na. Kadewa Saksi ring Pura Desa Puseh.
- (3). Warsa ayahan Prajuru Paiketan Krama Istri Desa Adat inggih punika limang (5) warsa.

Pawos 81

- (1). Swadharma Paiketan Krama Istri inggih punika :
 - ha. Ngeremba parikrama desa adat.
 - na. Nincapang kaweruhan raga minakadi adat, agama, dresta, miwah sane tiyosan.
- (2). Swadikara Paiketan Krama Istri inggih punika :
 - ha. Pesayuban saking Desa Adat.
 - na. Ngangge pradruwen Desa Adat.

Pawos 82

- Prajuru Paiketan Krama Istri kausanang utawi kagentosin prade :
 - ha. Seda.
 - na. Nilar sesana Paiketan.
 - ca. Wusan warsa ayahan nyane.

Kaping 5
Sekaa Miwah Lembaga Adat Tiyyosan

Pawos 83

- (1). Krama Desa Adat kengin ngardi sekaa utawi paiketan minakadi adat, seni, budaya, muah sane tiyyosan.
- (2). Sang pacang ngardi sekaa utawi paiketan patut mesadok ring Prajuru Desa Adat antuk kabuatang lan kawigunannia.
- (3). Desa Adat patut ngilikita sajeroning sekaa utawi paiketan sane wenten ring Desa Adat.

Palet 5
Indik Kulawarga
Kaping 1
Pawiwahan

Pawos 84

- (1). Pawiwahan inggih punika patemoning purusa pradanan melarapan antuk panunggalan kayun suka cita kadulurin upesaksi sekala niskala.
- (2). Pawiwahan sane kemanggehang ring Desa Adat Munduk, indik pawidi widana kapuputang antuk sang wenang mamuput karya utawi Ida Sang Sulinggih.
- (3). Kesaksiang antuk :
 - ha. Prajuru Desa Adat keluarga pinaka manusa saksi.
 - na. Dewa Saksi (pawidi widana).
 - ca. Bhuta Saksi (Makala kalahan) beakaon.
- (4). Yan tan nganutin sekadi inucap ring ajeng, durung kewastanin puputing yadnya pawiwahan, tur manggeh sebel kandel.
- (5). Kailikita antuk *surat keterangan perkawinan* utawi wiwaha patra.

Pawos 85

- (1). Pamargin pawiwahan luwire :
 - ha. Pepadikan : maduluran antuk suka cita sangkaning paigum pakaryan kuluwarga sang kalih.
 - na. Ngerorod (merangkat) : melarapan antuk suka cita lanang istri, wates pejati arahina awengi.

- ca. Yening ngambil wiyadin kaambil saking dura desa patut masadok ring Bendesa Adat utawi Prajuru Desa.
 - ra. Yening wenten pangetut saking kaluwarga sang sane istri taler patut masadok ring Prajuru Desa.
- (2). Pidabdab sang pacang mawiwaha :
- ha. Sampun munggah daha utawi teruna tur mayusa senistannia siangolas (19) warsa manut UU Perkawinan No. 16 Tahun 2019.
 - na. Sangkaning padalila (tan kapaksa).
 - ca. Prade mesiosan agama patut kadulurin upacara Sudi Wadani.
- (3). Upacara Sudi Wadani inucap kelaksanayang nganutin tata cara saking PHDI.

Pawos 86

- (1). Pawiwahan tan patut :
- ha. Durung mayusa siangolas (19) tiban.
 - na. Ngerangkatan (ngambil) tumin di nyama, oka, ponakan ngarep, semeton sodet, semeton sios ibu, muang saluwiring matunggalan susu (gamia gamana).
 - ca. Angrabining wonga rabi.
 - ra. Salah Timpal.
- (2). Krama desa sane mamurug kecaping pawiwahan patut kapamidanda manut pararem tur katurang sang amungkurat.

Pawos 87

- (1). Pawiwahan anak istri ke dura desa patut ngaturang sarma mapiteges pelepas ayahan daha teruna.
- (2). Ageng sarma inggih punika selae (25) kg beras.
- (3). Sarma ngeranjing ring Banjar Adat.

Pawos 88

- (1). Piteges pawiwahan sang patut merabi adiri, sejawaning wenten pasubaya saking rabine utawi paetangan bebawos pacang merabi malih.
- (2). Pawiwahan ngemaduang patut polih kacumpuan saking istri kapertama.

Pawos 89

- (1). Perade wenten anak istri mobot nenten wentn ngangkenin, patut kaupecara olih guru rupakan nyane.
- (2). Yan wenten lanang wadon durung merabian, sakewanten pratingkahe sekadi makurenan, lintang arahina patut karampag tur kabawosin antuk Prajuru.

Kaping 2 Nyapian

Pawos 90

- (1). Pawiwahan kasungguh wusan melarapan antuk perabiane palas sangkaning ngawit wicara tan suka cita panunggalan idep utawi sinalih tunggil seda.
- (2). Krama palas merabian, patut kapuputang ring pengadilan sanistania sampun ketatas antuk Prajuru Desal lan keilikita sekadi patut.
- (3). Wusan merabian sangkaning palas mapiteges Nyapian.
- (4). Wusan merabian sangkaning silih sinunggil seda mapiteges Balu.

Pawos 91

- (1). Tata titi palas merabian sekadi ring sor :
 - ha. Mesadok ring Prajuru.
 - na. Naur pamidanda petang dasa (40) kg beras.
 - ca. Mapamit saking merajan sang lanang.
 - ra. Kapamikukuh antuk ilikita utawi *surat keterangan* palas merabian.
- (2). Indik pamidanda palas merabian sekadi ring sor :
 - ha. Perade palas pada lila pamidanda ketawur pada apahro.
 - na. Parade palas mawit sang lanang pamidanda ketawur olih sang lanang.
 - ca. Perade palas mawit saking sang istri, pamidanda katawur olih sang istri.
- (3). Pamidanda palas merabi ngeranjing ke Desa Adat.
- (4). Prade sang palas merabi adung malih patut ngelaksanayang upacara pawiwahan malih tur kaupesaksi olih Prajuru Desa Adat.

Pawos 92

- (1). Prade palas merabian pada lila indik guna kaya polih pah-pahan.
- (2). Prade tan pada lila, indik pah-pahan guna kaya katunasang pematut ring guru wisesa.
- (3). Warisan kekuasa antuk purusa.
- (4). Sentana sami kekuasa antuk purusa.
- (5). Prade sang palas merabi medruwe oka alit, sang istri patut sareng ngupa jiwa putrane manut swadharma guru rupaka jantos mayusa pitulas (17) warsa utawi manut kacumpuan pasubayan sareng kalih.
- (6). Nenten dados megat paiketan kekeluargaan anak lan ibu.

Pawos 93

- (1). Balu Kabinayang dados :
 - ha. Balu luh wit sentana (sentana rajeg), miwah balu luh boya sentana.
 - na. Balu lanang kapurusa (wit sentana), miwah balu lanang nyeburin (boya sentana).
- (2). Swadharmaning balu :
 - ha. Ngemanguhang pati brata, tan kengin ngemargiang para dara utawi drati krama.
 - na. Mupunin waris pagunakaya, tan dados ngadol, ngadeang, makidihang, lan sane seosan, sejawaning wenten indik mabuat tur sampun kacumponin antuk pianak utawi kulawarga sane pinih tampek perade ipianak kantun alit-alit.
 - ca. Kengin ngidih sentana perade wenten pidabdab sadurung sinalih tunggil seda saha kengin antuk kulawarga singgih purusa.
 - ra. Dados mawiwaha malih.
- (3). Balu kaucap tan pageh sekdi ring sor :
 - ha. Drati krama utawi para dara.
 - na. Matilar saking pakubon tan pasadok jantos pitung (7) rahina (awuku).
 - ca. Lempas ring swadharma seosan, tan prasidha ngesein raga.

Kaping 3 Sentana

Pawos 94

- (1). Sentana wenten tigang (3) soroh inggih punika :
 - ha. Prati Sentana, sentana sane metu saking pawiwahan kapatut.
 - na. Sentana Paperasan, sentana sangkaning ngangkat saking kulawarga purusa utawi pradana antuk upasaksi sekala niskal.
 - ca. Sentana Rajeg, prati sentana wadon (predana) sane kemanggehang lanang (purusa) tur sampun ngelaksanayang pawiwahan nyeburin.
- (2). Prade pawiwahan tan kepatut ngawetuang sentana mangda tan kabawos Bebinjat utawi Astra Yogja kamanggala antuk penyangaskara.

Pawos 95

- (1). Prade pawiwahan tan ngemetuang sentana, kengin ngangkat sentana paperasan yan sampun kacumponin olih kulawarga.
- (2). Ngangkat sentana manut dudonan :
 - ha. Patut makacihna artha brana peperasan sane keupasaksiang sekala niskala, lan
 - na. Katunasang pamikukuh ring guru wisesa.
- (3). Krama desa sane pacang ngangkat sentana patut mesadok ring Prajuru Desa senistania asasih sedurung upacara peperasan.
- (4). Bendesa Adat kesarengin Kelian Banjar Adat Nyobyahang ring wewidangan Desa Adat sang sapa sira ugi krama sane rumaksa tan lila ngeninin indik nunas sentana punika, mangda mesadok ring Prajuru masengker kalih (2) wuku sedurung upacara peperasan.
- (5). Bendesa Adat digelis mawosin saha ngicenin pamutus nepek ring dresta, awig lan utawi pararem manut *Hukum* Adat Bali.
- (6). Prade sulur peperasan tan manut ring kecaping ajeng, Bendesa Adat wenang ngadeg sang pacang mekarya, saha ngicenin panuntun, mangda kapuputang rihin sulur bebawos utawi wicarane.

Pawos 96

- (1). Peperasan sane kepatut ring Desa Adat risampun makecihna :
 - ha. Widi widana peperasan
 - na. Keupasaksi antuk Bendesa Adat utawi Prajuru Desa Adat sane makelingang utawi ngilikitayang.
 - ca. Kasobyahang ring krama Desa Adat.
- (2). Sane patut kaperas angge sentana inggih punika :
 - ha. Megama Hindu.
 - na. Kautamayang saking waris pancer purusa utawi pepernahan nedunang saking sang meras.
 - ca. Kuluwarga saking purusa, yan tan wenten kengin saking pradana, yan perade tan wenten wau kengin sekama-kama.
 - ra. Sinalih tunggal mawiwit saking kulawarga tunggal sanggah utawi merajan, paibon, dadya, utawi ngambil jadma seos sakewanten Megama Hindu.
- (3). Kengin ngangkat sentana peperasan langkung ring adiri, lanang wiyadin wadon.

Pawos 97

- (1). Sang sane dados kearsayang Sentana Rajeg mawiwit tetiga (3) inggih punika :
 - ha. Prati Sentana wadon adiri, utawi sinalih tunggal prati sentana yening sami prati sentana wadon.
 - na. Sampun kemanggehang dados prati sentana purusa.
 - ca. Pawiwahan kaceburin, kautamayang antuk jadma sane megama seosan tur sampun mesudiwadani.
- (2). Sane kemanggehang Sentana Rajeg patut masadok ring Prajuru Desa Adat.
- (3). Bendesa Adat kasarengin Kelian Banjar Adat nyobyahang ring Krama Desa Adat.

Pawos 98

- Rajeg sane kapatut ring Desa Adat risampun makecihna :
- ha. Sampun polih kacumpuan saking kulawarga purusa.
 - na. Widi Widana ngemanggehang dados prati sentana purusa.
 - ca. Pawiwahan kaceburin antuk jadma seos agama sane sampun mesudiwadani.
 - ra. Kaupasaksi antuk Prajuru Desa Adat lan utawi Banjar Adat.

ka. Kasobyahang ring Desa Adat.

Kaping 4 Pewarisan

Pawos 99

- (1). Warisan inggih punika tetamian arta brana, hutang rawuhing ayah-ayahan ngupadi sukarta sekala niskala saking leluhur marep ring sentananyane.
- (2). Kang sinanggeh warisan luwire :
 - ha. Duwe tengah mekadi tegak ayahan desa, kahyangan, pusaka siwa karana.
 - na. Pemerajan kemulan.
 - ca. Paguna kayan, tadtadan, utawi jiwa dana, hutang piutang.
- (3). Wawu kabawos warisan prade wenten :
 - ha. Sang ngewarisang (pewaris).
 - na. Sang ngewarisin (ahli waris).
 - ca. Arta Brana tetegenan (ayah-ayahan) makacihna warisan.

Pawos 100

- (1). Sang kasungguh sane ngewarisin (ahli waris) luwir ipun :
 - ha. Preti Sentana.
 - na. Sentanan Peperasan Lanang (purusa).
 - ca. Sentana Rajeg kemanggehang purusa.
- (2). Prade tan wenten sekadi inucap, kang sinanggeh sang ngewarisin (ahli waris) luwir ipun :
 - ha. Turuna purusa ngunggahang makadi rerama lanang, pekak, selanturnya rerama misan mindon.
 - na. Turunan purusa pernah kesamping sekadi keponakan miwah mindon.

Pawos 101

- Swadharma sang sane ngewarisin :
- ha. Nerima saha ngusahang tetamian pahan saking kaluhurannia, makadi : ngrompon sanggah, pura, saha pengupakarannia miwah ayah-ayahan sang ngewarisang.
 - na. Ngabenang sang ngewarisang jantos puput upacarannia.

- ca. Nawur hutang-hutang sang ngewarisang manut pangelokita.

Pawos 102

- (1). Pangepahan warisan manut sekadi ring sor :
- ha. Sampun ngelaksanayang pitra yadnya lan hutang-hutang sang ngewarisang tuntas ketawur.
 - na. Sang ngewarisin polih pahpahan pada sangkaning pagunakayan.
- (2). Sinalih tunggil sang ngewarisin wenang tan polih pahan perade :
- ha. Nilar kawitan, utawi sesaning agama.
 - na. Tan manut ring swadharma sang ngewarisin.
 - ca. Sentana Rajeg kesah mawiwaha, utawi sentana mawiwaha nyeburin soang-soang kabawos ninggal kedaton.
- (3). Boya sang ngewarisin (*ahli waris*) kengin muponin hasil manut dudonan luwire :
- ha. Sentana luh, salami durung kesah mawiwaha.
 - na. Balu luh wiyadin lanang nyeburin (soang-soang boya sentana).
 - ca. Mulih ke daha utawi teruna riantukan ring pawiwahan pecak sampun kabawos ninggal kedaton.
- (4). Sang ngewarisin (*ahli waris*) kengin meweweh rikala maurip pinaka jiwa dana, tadtadan utawi bekel, makacihna paweweh tetep ring pianak sane kesah mawiwaha.
- (5). Prade sajeroning kulawarga wenten sang ngewarisin langkung ring adiri patut :
- ha. Kawentenang paiguman indik pahan waris inucap.
 - na. Yan tan prasida cumpu patut katunasang tetimbang ring Prajuru Desa Adat.
 - ca. Prade tan wenten kacumpuan ring penepas Kertha Desa Adat, katunasang ring MDA manut undagania utawi sang rummawos.

Pawos 103

- (1). Prade wenten karang kaputungan patut kadruwe olih Desa Adat.
- (2). Prade wenten sinalih tunggil krama desa camput (putung) ketiban antaka tur tan wenten kulawarganyane sane patut ngodag, patut kawengku olih Desa Adat pangupakarannia jantos puput (ngaben),

sekancan padruwenyane patut ngeranjing ke Desa Adat risampun sapretekanya.

- (3). Yan prade krama camput (putung) ketiban antaka sakewanten kantun medue kulawarga dadia, patut kasaprateka jantos puput olih kulawarga dadyanyane, sakancan padruwen guna kayan ipun ngeranjing ke dadia.
- (4). Parindikan kecap ring ajeng tan wenang perade karang inucap megenah ring padadianan.
- (5). Yan perade parindikan karang kaputungan ngemetuang wicara patut pararem penepas wicara.

SARGAH VI SUKRETA TATA PALEMAHAN DESA ADAT

Palet 1

Indik Tanah Miwah Lingkungan Alam Desa Adat

Kaping 1

Tanah Desa Adat

Pawos 104

Tanah padruwen Desa Adat Munduk inggih punika :

ha. *Tanah Kahyangan Desa Adat luwire :*

- 1) *Tanah Pura Puseh Desa jimbarnyane 17.650 m2.*
- 2) *Tanah Pura Dalem jimbarnyane 1.900 m2.*
- 3) *Tanah Pura Melanting jimbarnyane 500 m2*
- 4) *Tanah Pura Penakluk Merana jimbarnyane 550 m2*
- 5) *Tanah Pura Padmasana Br. Tamblingan jimbarnyane 1200 m2.*
- 6) *Tanah Pura Prajapati jimbarnyane 2.180 m2*
- 7) *Tanah Pura Catus Pata jimbarnyane 30 m2*
- 8) *Tanah Pura Subak jimbarnyane 170 m2.*

na. *Tanah Kantor Bendesa Adat Munduk jimbarnyane 1.225 m2.*

Pawos 105

- (1). Setra, carik, tegal, miwah danu sane wenten ring kakuwub wewidangan Desa Adat Munduk puniki sajabaning palemahan Desa Adat manggeh ngranjing dados talajakan desa.
- (2). Sahanan krama patut ngulati kelestarian telajakan Desa Adat.

Palet 2
Indik Karang Miwah Tegal

Pawos 106

- (1). Sahanan karang patut :
 - ha. Pastika wates ipun.
 - na. Medruwe pemedal.
 - ca. Kailikita utawi medruwe *Sertipikat Hak Guna Pakai (SHGP)*
- (2). Karang Desa, wates sisi kaler patut kakaryanin antuk krama sane ngemong karang inucap manut dresta. Wates punika mawasta gegaleng keluan.
- (3). Tegal utawi carik miwah tanah padruwen ngeraga, wates sisi kelod miwah kawuh patut kakaryanin wates olih sang medruwe tanah inucap, punika mawasta gegaleng keteben.
- (4). Prade kerasayang pagehan utawi tembok inucap ngelikadin, yan pade arsa penyandinge, kengin watese nganggen pinget kewannten kasaksi antuk Prajur Desa Adat utawi cihna pal.
- (5). Prade wenten karang kebebeng mangda kautsahayang wenten margi nyane.
- (6). Sertifikat karang Desa Adat wenang kegamel olih Desa Adat.

Pawos 107

- (1). Sinalih tunggil krama desa tan wenang :
 - ha. Ngalah-alah margi, tegal, carik, karang desa, lan karang ayahan desa.
 - na. Ngalah-alah karang tegak kahyangan, setra, lan sekancan karang tegak sinanggeh suci.
 - ca. Ngadeang utawi ngadol karang ayahan desa.
 - ra. Ngembahang toya wit bada wewalungan, pasiraman, kakus, pawaregan utawi sane tiosan ke pekarangan, margi, utawi kapaumahan krama tiyos.
 - ka. Nanem wangke wewalungan sejawaning ring setra.
- (2). Krama desa sane tan manut ring ajeng wenang keni pamidanda manut ring sor :
 - ha. Patut ngewaliang sane kealah-alah miwah keni danda manut pararem.
 - na. Prade sane ka alah-alah karang kahyangan desa, tiyos danda sekadi ring ajeng taler maweweh pengnyanggaskara tanah kahyangan sane ka alah-alah.

- ca. Patut nyampetin utawi ngaryanang pemargin toya sumaken.

Pawos 108

- (1). Krama Desa Adat sane ngentosin kabuatan lan swadikara antuk karang ayahan Desa Adat patut mesadok ring Prajuru Desa Adat.
- (2). Ngentosin kabuatan lan swadikara antuk karang ayahan Desa Adat patut mejalaran paruman Desa Adat.
- (3). Karang ayahan Desa Adat sane kegentosin kabuatan nyane antuk krama, kanggen usaha sane dikontrakan patut ngaturang pikolih dum pada ring Desa Adat.

Pawos 109

Karang ayahan desa sane tan keayahang antuk krama sanistania limang (5) warsa wenang kadruwe antuk Desa Adat.

Pawos 110

- (1). Waledan utawi rekinan pekarangan patut keenter olih soang-soang krama ring paumahan soang-soang.
- (2). Parindikan waledan utawi rekinan pekarangan ring Desa Adat keenter manut pararem.

Palet 3

Indik Wewangunan, Wewangunan, miwah Pepayonan

Kaping 1

Wewangunan

Pawos 111

- (1). Sinalih tunggil krama sane pacang ngewangun patut :
 - ha. Mesadok ring Bendesa Adat utawi Prajuru, prade wewangunane ngeninin wates utawi marga, sadurung kadadosang, tan kengin ngewangun.
 - na. Nganggen Asta Bumi miwah, gegulak, saha Asta Kosala-Kosali, sanistanya ring patitis niskala.
 - ca. Tan patut ngayubin ka pisaga.
 - ra. Wates wewangunan adapa saking tepian margi.
 - ka. Tan patut ngembahang toya ke pisaga utawi ke marga.
- (2). Prade wewangunane ngayubin, bilih-bilih temboke tengahing wates, risampun kawara, sang madruwe karang wenang :

- ha. Kasadokang ring Prajuru.
 - na. Kapidanda manut pararem saha tembok inucap kegubar olih sang medruwe tan polih prabea.
 - ca. Yening wates wewangunan inucap sampun jangkep, taler wewangunan inucap durung kegubar, wenang ketangenin olih krama Desa Adat.
- (3). Ngewangun wewangunan sane matumpang yening nyanding genah suci (Kahyangan Desa/ Tiga), masengker apanimpug (3-5 meter), sawawaring wewangunan matumpang punika keanggen genah suci.

Pawos 112

- (1). Krama Tamiu wiadin Tamiu sane pacang ngewangun ring wewidangan Desa Adat patut mesadok ring Prajuru antuk kabuatan lan kawigunannyane.
- (2). Sang ngewangun unit perumahan ring wewidangan Desa Adat, patut ngaturang punia manut kaiguman kadulurin antuk ilikita kesumanggeman medaging materai sekadi patut.

Pawos 113

- (1). Tamiu tan kengin ngewangun genah ibadah ring palemahan wewidangan Desa Adat.
- (2). Krama Desa Adat lan Krama Tamiu tan kengin ngewangun Ashram utawi parahyangan non dresta Bali ring palemahan wewidangan Desa Adat.

Kaping 2 Wewalungan

Pawos 114

- (1). Krama Desa sane miara saluiring wewalungan patut sayaga negul utawi ngelogor mangda tan medal ke margine, ngerusakin karang utawi pabianan krama tios.
- (2). Wewalungan sane malumbar mawastu ngrusak tetanduran utawi druwen krama tios risampun kawarah kengin kataban, sang medruwe wewalungan wenang kapidanda saha ngewalian prabea sane karusak manut paiguman.
- (3). Wewalungan sane ngrusak tegak kahyangan utawi genah suci, sang medruwe wewalungan kapidanda, miwah prabea upacara penyangaskara manut dresta/pararem.

Pawos 115

Krama Desa tan kewenangang ngangon ring :

- ha. Palemahan Pura utawi Kahyangan Desa.
- na. Pura Panti utawi Dadya miwah genah suci tiosan.
- ra. Setra.
- ka. Genah druwen Desa.

Pawos 116

(1). Krama tan wenang :

- ha. Medil sahanan manuk utawi sato ring wewidangan Desa Adat.
- na. Nyeterum lan utawi nuba sahanan mina ring tlabah, tukad, miwah danau ring wewidangan Desa Adat.

(2). Krama sane mamurug kecap ring ajeng patut kapamidanda manut pararem.

Pawos 117

(1). Pesayuban sato, mina, manuk, lan wewalungan ring wewidangan Desa Adat kaenter manut pararem.

(2). Bhaya wit sangkaning wewalungan patut kaenter manut pararem.

Kaping 3 Pepayonan

Pawos 118

- (1). Ngawit nandur tanem tuwuh patut adepa agung (2,5 meter) ngajeroang saking wates tur prade jantos ngeliwat wates wenang kasepat gantungin.
- (2). Yening wenten tetanduran ngukubin, semaliha mewastu mayanin kapisaga patut kewara antuk paiguman ping ajeng mangda presida sang nuruwenang wit ngerebah utawi notor.
- (3). Prade sampun kewara taler tan wenten usaha sang neruwenang wit sang kajerihang, wenang nyadookang ring Bendesa Adat utawi Prajuru.
- (4). Yening jantos ping tiga (3) nyadookang taler during kerebah, sang nyadookang wenang ngerebah utawi notor kesaksi olih Prajuru tur patin pepayonan inucap patut kedruwe olih Desa Adat.

Pawos 119

- (1). Tan wenang ngerebah tanem tuwuh ring margi sane ngawinang wewidangan desane asri tan pasadok lan kengin olih Prajuru.
- (2). Tan wenang nandur sahanan tetanduran ring sisin margi alit (gang) utawi telajan sisih penyengker sane mekardi margi cupit.
- (3). Ngeninin indik pepayonan selanturnia kaenter manut pararem.

Palet 4

Indik Wewidangan Desa Adat

Kaping 1

Ngelestariang Palemahan miwah Wewidangan Desa Adat

Pawos 120

- (1). Ngelestariang Desa Adat kapetitis antuk ngardi :
 - ha. Ngewangun Krama Desa Adat madasar antuk adat, agama, dresta miwah budaya krama Bali.
 - na. Ngelestariang Budaya Bali sane sidha nyaring ius budaya asing.
 - ca. Kawentenan Desa Adat ri sajeroning nincapang kawentenan krama Desa Adat.
 - ra. Pasikian Krama Desa Adat ri sajeroning ngewangun.
- (2). Ngelestariang Desa Adat inucap ring ajeng kalaksanayang manut rasa saling asah, saling asih, saling asuh, gilik saguluk, paras paro, salulung sabayantaka, lan sarpana ya.

SARGAH VII

PADRUWEN, UTAHA, MIWAH PANGRENCANA JINAH DESA ADAT

Palet 1

Indik Padruwen Desa Adat

Pawos 121

Padruwen Desa Asat Munduk inggih punika :

- ha. Pura Desa Puseh.
- na. Pura Dalem.
- ca. Pura Prajapati.
- ra. Pura Catus Pata.
- ka. Pura Melanting Tenten.
- da. Setra.
- ta. Wantilan Desa Adat Munduk.

sa. Wantilan Banjar Adat Tamblingan.

Palet 2
Indik Utsaha Desa Adat

Pawos 122

- (1). Utsaha Padruwen Desa Adat Munduk luwire :
 - ha. Labda Pacingkreman Desa (LPD).
 - na. Baga Utsaha Padruwen Desa Adat (BUPDA).
- (2). Kawentenan Labda Pacingkreman Desa (LPD) kaenter manut *Peraturan* Gubernur Bali.
- (3). Kawentenan Baga Utsaha Padruwen Desa Adat (BUPDA) kaenter manut *Peraturan* Gubernur Bali.
- (4). Kawenten Utsaha Padruwen Desa Adat patut nyupeksa indik pemargi utsahania nyabran sasih majeng ring Bendesa lan Panureksa.
- (5). Utsaha Padruwen Desa Adat patut nyobyahang indik kewentenan utsahania nyabran awarsa ring paruman desa.
- (6). Utsaha Padruwen Desa Adat patut ngaturang olih-olihan ring Desa Adat.

Palet 3
Indik Penganggaran Desa Adat

Pawos 123

- (1). Olih-olihan Desa Adat Munduk :
 - ha. Paica Guru Wisesa.
 - na. Urunan krama.
 - ca. Pahan saking Pariwisata.
 - ra. Pahan saking Utsaha Padruwen Desa Adat (LPD wiyadin BUPDA).
 - ka. Sesari Piodalan.
 - da. Pamidanda.
 - ta. Dudukan.
 - sa. Dana Punia.
 - wa. Punia.
 - la. Sarma.
- (2). Sahanan olih-olihan Desa Adat patut ngeranjing ring Desa Adat, kaenter olih Prajuru, lan kesobyahang ring paruman desa.
- (3). Olih-olihan Desa Adat kaangge manut kabuatan Desa Adat tur nganutin pidabdab lan sesuluh saking Guru Wisesa.

SARGAH VIII
TATA HUBUNGAN KERJASAMA MIWAH MAJELIS DESA ADAT (MDA)
Palet 1
Indik Tata Hubungan Kerjasama Desa Adat

Pawos 124

- (1). Desa Adat wenang ngardi pasaruronan sareng Desa Adat penyanding wadin sane tiosan.
- (2). Pasaruronan pantaraning Desa Adat patut kasadokang ring MDA manut undagannia.
- (3). Pasaruronan pantaraning Desa Adat miwah sane tiyosan patut kasurat antuk kaiguman lan kauningin antuk MDA manut undagannia.

Pawos 125

- (1). Pasaruronan pantaraning Desa Adat patut minakadi ring baga :
 - ha. Nincapang usaha sareng-sareng sane kadruwenang mawastu nincapang pikoli sane sayan nincap.
 - na. Parikrama pakraman, sewana, pewangunan, miwah sane tiosan pantaraning Desa Adat.
 - ca. Katreptian miwah sane tiosan selami tan lempas ring adat, agama, dresta, lan budaya.
- (2). Pasaruronan pantaraning Desa Adat patut kaigumin olih krama mejalaran paruman Desa Adat.
- (3). Pasaruronan inucap kalaksanayang olih Prajuru Desa Adat tur patut kasurat antuk kaiguman muang sane tiosan.

Palet 2
Indik Majelis Desa Adat

Pawos 126

Desa Adat Munduk :

- ha. Mapaiketan ring sajeroning genah Paiketan Majelis Desa Adat (MDA), lan satinut utawi satya majeng ring MDA.
- na. Patut *berkonsultasi* lan *berkoordinasi* sareng MDA manut undagannia.
- ca. Satinut ring putusing MDA.

SARGAH IX
BHAYA, KULKUL, WICARA MIWAH DANDA
Palet 1
Indik Bhaya

Pawos 127

- (1). Parindikan Bhaya luwire :
- ha. Jiwa Bhaya.
 - na. Geni Bhaya.
 - ca. Lindu Bhaya.
 - ra. Toya Bhaya.
 - ka. Bayu Bhaya.
- (2). Sang manggihin kahanan bhaya patut nepak kulkul mapitulung.
- (3). Perade ring desa kahanan jiwa bhaya, Desa Adat patut ngaturang pamrascita manut dresta, sane mayanin katur ring ngawe wenang.
- (4). Perade wenten krama mamisuh utawi nguman-nguman, krama siosan patut ngewara, sang mamisuh kekeninin pecamil.

Pawos 128

- (1). Sang manggihin artha bhaya (kemalingan) patut ngulkul mapitulung, utawi sang kemalingan matur supeksa ring Prajuru Desa sane pacang nimbangin utawi nandanin anut daging awig saha maweweh penyangaskara prade ngemaling barang sinanggeh suci manut pararem.
- (2). Pratingkahe mapailon ring dusta kabawos saruron, prade wenten krama nyaduang patut kapamidanda manut pararem tur kasukserahang ring sane wenang.
- (3). Prade wenten jadma ngeranjingin pekubon wiyadin karang krama tiyos rikala suung, mewastu sang medruwe karang kaicalan, jadma inucap patut katuekang antuk medewa saksi ring Pura Desa Puseh.
- (4). Asing-asing ngeranjing ring pakubon krama tiyos :
- ha. Matengeran suara antuk om swastyastu ping telu (3).
 - na. Nyantos sang neruwenag umah.
 - ca. Masadok ring pengapit pinih nampek, makebuatan kerawuhane.
 - ra. Pamedal karangnia kedagingin sawen makacihna pewara rikala suung.

Palet 2
Indik Kulkul

Pawos 129

- (1). Kulkul ring Desa Adat Munduk luwire :
 - ha. Kulkul Desa Adat
 - na. Kulkul Banjar Adat
 - ca. Kulkul Subak
 - ra. Kulkul Paumahan
- (2). Tabuh tepakan kulkul Desa lan Banjar Adat :
 - ha. Tedun Ngayah : Atuludan alon.
 - na. Paruman : Telung tuludan alon.
 - ca. Pujawali/ Upacara Agama : Atuludan ning tung.
 - ra. Kapanca Bhaya : Bulus.
- (3). Tetepakan kulkul paumahan atuludan bulus tetenger kapanca bhaya.
- (4). Kulkul Desa lan Banjar Adat tan wenang ketepak yan tan sangkaning pituduh Prajuru, sejawaning tetenger kepanca bhaya.
- (5). Kulkul Paumahan tan patut matehin sukat kulkul Desa Adat lan Banjar Adat, prade mamurug wenang kapidanda manut pararem.
- (6). Prade wenten krama desa nepak kulkul paumahan sakemawon tan wenten panca bhaya wenang katiwakin pamidanda manut pararem.

Palet 3
Indik wicara

Pawos 130

- (1). Wicara inggih punika sahanan parindikan hukum adat risajeroning parahyangan, pawongan, lan palemahan wit sangkaning pinunas wiadin rebatan.
- (2). Wicara luwir ipun :
 - ha. Wicara Adat.
 - na. Wicara *Non Adat*, lan
 - ca. Wicara *Campuran*.
- (3). Desa Adat wenang muputang sahanan wicara adat sane wenten ring wewidangan Desa Adat.
- (4). Wicara *Non Adat* patut kasukserahang majeng ring sang wenang, sang mawicara kantun kengin nunas pamuput wicara manut adat, manut pinunas ngeraga sang mawicara.

- (5). Wicara *campuran* patut kapuputang manut adat/ awig/ pararem, lianan ring punika kasukserahang sekadi patut.

Pawos 131

- (1). Prajuru sane wenang muputang wicara ring Desa Adat inggih punika Kertha Desa Adat.
- (2). Tata dudonan muputang wicara adat kadi ring sor :
 - ha. Kapuputang antuk Prajuru Banjar Adat.
 - na. Kapuputang antuk Kertha Desa Adat, prade tan cumpu ring putusing Prajuru Banjar Adat.
 - ca. Kabawosin antuk MDA manut undagannia, prade tan cumpu ring panepas Kertha Desa Adat.
- (3). Risajeroning muputang wicara, Kertha Desa Adat patut ngutamayang manut parasparo, druwenang sareng-sareng (penyama baraya).
- (4). Pararem Pamutus Wicara patut pastika nyantenang iwang patut ipun sang mawicara melarapan antuk Tri Pramana (saksi, bukti, ilikita) miwah tan mari nepek ring Awig lan utawi Pararem Desa Adat.

Pawos 132

- (1). Yan prade parinikan wicara sane kapuputan mapaiketan ring Kelian Kertha Desa Adat utawi angga Kertha Desa Adat, Kelian utawi Angga Kertha Desa Adat inucap tan kengin nyarengin muputang wicara.
- (2). Kelian Kertha Desa Adat sekadi inucap ring ajeng patut kagentosin padgatakala antuk Angga kertha Desa Adat sane pinih wredha.

Palet 4 Indik Danda

Pawos 133

- (1). Desa Adat utawi Banjar Adat wenang niwakang danda majeng krama Desa Adat utawi krama Banjar Adat.
- (2). Paniwak danda inucap kalaksanayang olih Bendesa Adat utawi Kelian Banjar Adat manut pamutus sesampun awuku/ pitung (7) rahina.
- (3). Bacakan pamidanda luwire :
 - ha. Danda Arta.

- na. Rerampadan.
 - ca. Kedaut karang ayahannia.
 - ra. Kasepekan.
 - ka. Penyangaskara.
- (4). Pamidanda sane katiwakang patut manut ring ageng alit kasisipan nyane.
- (5). Danda marupa arta utawi rajabrana kadruwe olih Desa Adat utawi Banjar Adat.

Pawos 134

- (1). Krama sane langkung tigang (3) paruman ngelantur tan nawur urunan miwah dedandan wenang kerampag.
- (2). Rerampagan manut ring sor :
- ha. Kalaksanayang antuk Prajuru utawi Pecalang, tur kasarengin antuk ulun Dadia pinaka upasaksi.
 - na. Sang ngerampag sangkaning narsana ngambil barang utawi nyawenin tanem tuwuh akehnia manut utang sane sang karampag.
 - ca. Prajuru miteketang mangda piranti-piranti sane kerampag digelis ketawur mewaneng awuku, ring kutus rahina pacang kaadol.
 - ra. Tan ngeninin saluiring piranti sane patut tinggalang manut agama miwah mademang pangupa jiwa sang karampag.

Pawos 135

- (1). Prade sang pacang karampag angewara (ngalangin), parisolah punika mawastu tan nganutin awig-awig, karang desa sane kalinggihin wenang kadaut olih Desa Adat.
- (2). Semaliha yan perade taler ngalangin pemargine kadi ring ajeng, krama inucap wenang kasepekan.
- (3). Pamidanda inucap ring ajeng kasinanggeh buntas risampun sang katiwakin :
- ha. Nunas geng sinampura ring krama Desa Adat seantukan nguak pasubaya (pararem pecak).
 - na. Naur prabea panguak pasubayania, duk pacang kerampag kadulurin prayascita penyaksat kaiwangania ring Desa Adat.

SARGAH X
PEMBANGUNAN DESA ADAT
MIWAH PEMBANGUNAN PERDESAAN DESA ADAT

Pawos 136

Patitis pewangunan Desa Adat Luwire :

- ha. Mapikukuh swadikara pawiwitan, tradisional, adat, budaya, miwah dresta krama Desa Adat.
- na. Nincapang kasukretan krama Desa Adat.
- ca. Nangingin sahanan kabuatan krama ring sajeroning *Pendidikan lan Kebudayaan* medasar antuk Tri Hita Karana sane kemargiang ring sajeroning Sad Kerthi.
- ra. Nincapang kaweruhan Prajuru, Manggala Adat, lan Krama Desa Adat.
- ka. Muponin padruwen Desa Adat ka pungkur.
- da. Ngelimbakang piranti-piranti pengeremba Desa Adat.

Pawos 137

Pewangunan Desa Adat inucap ring ajeng kelaksanayang manut *nilai-nilai* Adat Bali : gilik saguluk, parasparo, salulung sabayantaka, sarpanaya, ngardi Satyam, Siwam, Sundaram.

Pawos 138

- (1). Pewangunan Desa Adat manut dudonan sekadi pangerencana, pemargi, lan panureksa.
- (2). Pengerencana Pewangunan Desa Adat sekadi kecap ring ajeng inggih punika :
 - ha. Pengerencana Pewangunan limang (5) warsa, lan
 - na. Pewangunan awarsa (1) Desa Adat.
- (3). Pengerencana Pewangunan Desa Adat kemanggehang majalaran Paruman Desa Adat.
- (4). Prajuru Desa Adat wenang nyobyahang pengerencana lan pemargin pewangunan Desa Adat kecap ring ajeng lan *Anggaran Pendapatan lan Belanja* Desa Adat majeng ring krama desa mejalaran piranti pewara-wara padruwen Desa Adat.
- (5). Parindikan selanturnia ngeninin indik pangerencana Pewangunan Desa Adat sane kecap ring ajeng kaenter manut *Peraturan Gubernur*.

Pawos 139

- (1). Pemargi Pewangunan Desa Adat nganutin pengerencana inucap ring pawos 138.
- (2). Pewangunan Desa Adat sane kecap ring ajeng kelaksanayang olih Prajuru Desa Adat kerombo antuk krama Desa Adat mejalaran rasa pasemetonan, parasparo, lan gotong-royong.

SARGAH XI PEMBINAAN DAN PENGAWASAN, PEMBERDAYAAN MIWAH PELESTARIAN DESA ADAT

Palet 1 Indik Penuntunan Desa Adat

Pawos 140

Desa Adat Munduk kapidabdab antuk :

- ha. Majelis Desa Adat (MDA) Provinsi Bali.
- na. Majelis Desa Adat (MDA) Kabupaten Buleleng.
- ca. Majelis Desa Adat (MDA) Kecamatan Banjar.

Palet 2 Indik Panureksa Desa Adat

Pawos 141

- (1). Panureksa Desa Adat Munduk inggih punika :
 - ha. Panureksa saking Guru Wisesa.
 - na. Panureksa saking Desa Adat.
- (2). Panureksa saking Desa Adat kelaksanayang antuk Sabha Desa Adat.

Palet 3 Indik Ngutsahayang lan Ngerajegang Desa Adat

Pawos 142

Saluwiring Pewangunan, Ngutsahayang lan Ngerajegang ring Desa Adat medasar antuk rasa saling asah, saling asih, saling asuh, gilik saguluk, parasparo, salulung-sabayantaka, sarpanaya krama Desa Adat.

SARGAH XII
NGUWAH-NGUWUHIN AWIG-AWIG LAN PARAREM

Pawos 143

- (1). Awig-awig wenang kauwah-uwuhin sanistania dasa (10) warsa.
- (2). Nguwah-nguwuhin awig kalaksanayang manut Paruman Desa Adat.
- (3). Awig-awig patut kaenter selanturnia antuk pararem manut petits lan kawigunannyane.
- (4). Pararem kengin kauwah-uwuhin perade wenten parindikan sane ten manut maduluran antuk Paruman Desa Adat.

Pawos 144

- (1). Saluwiring daging awig-awig sane sampun kasurat tur patut, kemanggehang.
- (2). Sahananing sane durung kasurat ring awig-awig minakadi dresta utawi adat sane sampun tetamian saking riyin manggeh kemargiang salami nenten nungkasin utawi lempas ring awig-awig.

SARGAH XIII

PAMUPUT

Pawos 145


- (1). Awig-awig puniki kaparipurnayang lan kaigumin ring Paruman Krama Désa Adat Munduk, ring Rahina Wraspati Pon Wuku Krulut, pananggal ping dasa, sasih Kadasa, Saka warsa 1947, kalinggatanganin antuk Bandésa Adat, Panyarikan, Patengen, Patajuh, lan Kelian Banjar Adat sa-Désa Adat Munduk.
- (2). Awig-awig puniki kajangkepin antuk Berita Acara Paruman.
- (3). Awig-awig puniki kalaksanayang ngawit kamanggehang.

Kamanggehang ring Désa Adat Munduk.

Munduk, 5 Juni 2025

Prajuru Désa Adat Munduk:


Ketan Arman


I Wayan Armawan


I Nyoman Bagiarta


I Ketut Sutisna


Kelian Banjar Adat Taman
Ketut Basma

Kelian Banjar Sa-Désa Adat Munduk:


Kelian Banjar Adat Dulakan
Cedé Jana


Kelian Banjar Adat Beji
Putu Seriyasa


Kelian Banjar Adat Tamblingan


Putu Ermawan

Pangrampih:

Bandésa Madya
MDA Kabupaten Buleleng

I Dewa Putu Budharsa, SH

Bandésa Alitan
MDA Kecamatan Banjar

I Putu Darsana

Saha Uning:

MAJELIS DESA ADAT PROVINSI BALI

Nompr.: *085/AWG-F/MDAP/XI/2020*

Tanggal: *20 November 2020*

Bandésa Agung,

Ida Pangelingsir Agung Putra Sukahet
S.H.,M.H



Panyarikan Agung,

DR. Dewa Nyoman Rai Asmara Putra,

Telah Dicatatkan
Pada Dinas Pemajuan Masyarakat Adat Provinsi Bali
Tanggal : 1 Desember 2025
Registrasi Nomor : A/0097/0114/006/01/DPMA/2025